



勉菴集

十五

共二十三

16  
2374  
15





和  
2374  
23-15

勉菴先生文集卷之二十九目錄



墓碣

司憲府監察鄭公墓碣銘

默軒金公墓碣銘

愈樞李公墓碣銘

成均生員李公墓碣銘

同敦寧金公墓碣銘

鄭春灘墓碣銘

李芝南翁墓碣銘

柳塢韓公墓碣銘



同中樞權公墓碣銘

幽甯權公墓碣銘

權西洲翁墓碣銘

石林權公墓碣銘

松山君玩休齋姜公墓碣銘

壺山魏公墓碣銘

義禁府都事南君墓碣銘

南谷韓公墓碣銘

學生金公墓碣銘

箴齋慎公墓碣銘

雙峰柳公墓碣銘

贈兵曹參判朱公墓碣銘

贈司憲府持平趙公墓碣銘

左副承旨慎公墓碣銘

六友堂崔公墓碣銘

松谷柳公墓碣銘

姜義士墓碣銘

寒溪處士鄭公墓碣銘

靜齋李公墓碣銘

士農窩河公墓碣銘



雲塲趙君墓碣銘

贈叅議愚齋金公墓碣銘

贈吏曹叅議李公墓碣銘

僉中樞忍菴金公墓碣銘

昌原府使休圃韓公墓碣銘

直方齋文公墓碣銘

勉菴先生文集卷之二十九目錄

勉菴先生文集卷之二十九

墓碣

司憲府監察鄭公墓碣銘

并序

余閑居門雀可羅前注書鄭君鴻錫自晉陽千里而至揖而言曰吾先君器宇軒昂姿性豪邁不規規於小而篤於人倫不營營於世而志存濟物其奉先則祭田墓儀罔或有闕其恤族則貧窮婚喪皆有助給治家以嚴御下以寬以之接賓客處鄉黨恩義周徧無不愛慕欣欣然筮仕繕工監假監役至司憲府監察壽僅五十一而終吾先君生老避僻雖不槩見平





生孝友勤儉誦在鄉里若得公一言以銘于墓是生  
死俱幸余不容辭謝遂叙其世系子孫而銘之公諱  
煥教字穰言鄭氏貫海州其上世曰高麗侍中致仕  
諱肅入我朝有諱易議政府左贊成謚貞度有諱  
希儉進士贈吏判郎虛菴諱希良弟也虛菴值燕  
山政亂佯沉江遯世公亦隱不仕三傳至諱文多兵  
曹參判宣廟壬辰有復北關大功仁廟朝以詩  
案遇禍後贈左議政謚忠毅忠毅公之子曰大隆  
痛父非命遂盡室南下寓于晉誠子孫勿復仕自是  
四五世皆謹守先訓只以文學行義相傳爲箕裘會

祖諱鑑毅祖諱漢賢考諱益德妣廣州李氏正言基  
禎女諱匡愚密城朴氏某女即公之本生也憲宗  
己亥生卒于今上庚寅葬在州之月牙山負丙原  
以夫人安氏祔公凡四娶初配安東權氏仁川李氏  
順興安氏坡平尹氏其後配也有二男二女長即鴻  
錫甲午文科過房女進士河世鎮安氏出次麟錫進  
士女幼者尹氏出公初患家貧能赤手致產塋及貲  
饒好施與鄰里之待以舉火者十餘家嘗恨少不力  
學歎曰人生不學問與馬牛奚異盖有志未能云銘

曰



人亦有言富維衆怨公能得譽由謀之遠孝則推本  
睦則及鄰是曰積善何慶不臻苑彼庭樹二枝並榮  
未艾之蔭永庇後生

默軒金公墓碣銘 并序

公諱漢祥字敬一世居咸平之五柳村其生以景  
宗壬寅卒於 英宗甲午葬在劔舞山先塋坐酉之  
原金氏系出駕洛高麗侍中琢其遠祖也會祖諱星  
瓚見 皇明運訖蹈海遯跡世稱海隱處士祖諱厚  
宅考諱起鳳妣羅州林氏穩女公天姿秀凡文藝夙  
就輩行莫敢先事親至孝志養無違又能明於義理

於聲利邊一切泊如每空山月夜輒誦紫陽翁招隱  
操音韻悲壯有翛然出塵之想一時人士咸推以海  
隱公肖孫配光山金氏考在弼二男弘彥柱彥俱以  
文學著孫道文道行道璜曾玄以下不盡錄六世孫  
志學師事重葦金公志尚遠大有方進未已之勢可  
見餘蔭之未艾也銘曰

允矣海翁高尚其士公承厥武坦蕩素履蕭然環堵  
風雨不蔽何以遺後經史家計抱珍不售有識攸概  
我闡厥由垂示百載

僉樞李公墓碣銘 并序



吾東尚教化各賢願儒代不絕人高者為王者師次者為學者師皆名顯當世德垂于後其不能及此而草樹猷畝之間一善一行之士徃徃多湮沒無著者則仁人君子又必博搜而公禰之亦淑世勸俗之意也余讀竒松沙宇萬珩為僉樞李公狀未嘗不悲其意也謹按公諱錫屋字茂而李氏貫慶州始祖謁平新羅佐命功臣勝朝有鷄林府院君文忠公齊賢以德業文章有大名至今稱益齋先生益齋之考曰檢校政丞文定公瑱又其考曰尚書左僕射翽自是簪紱駟突及本朝光陵時有諱在仁蔭縣監於再思

堂竈為從祖也見再思被戊午禍即南遷至靈光家徵辟皆不就後移高敞今為高敞人高祖長白直長曾祖益新祖鶴齡並即階考以坤妣綾城朱益茂女其生以英廟壬戌三月干支歿於純廟壬午三月九日享年八十一職僉樞壽故塋在本郡之水谷面清溪洞甲原齊長城徐氏考道仁有婦德先公塋別塋于禮洞良原三男八源萬源百源二女壻晉州姜垓義城金達八源無子子集仁萬源子長即集仁生貞次集奎集麟百源子集友集豐狀曰公資性端厚幼已孝養前後喪皆廬墓始受學於從祖竹亭公



鳳齡必以踐履為主不務虛聲名又能淡於功利不  
屑場屋族黨或以門戶之責勸之舉公曰身心內也  
科宦外也吾救過能在內者猶不給在外者於我何  
有吾祖宗威名在後由德不由位惟德之修困約非  
替不修德而欲藉科宦為門戶計不矣松沙嘗至此  
而歎之曰世教衰民不興行一轉而為奔競又一轉  
而為亂賊為世巨患其為濫觴則皆由於棄德而  
希寵駸駸馴致乎今日也若公之此言者吾願鐫刻  
為小牌子以與人人為元符則其有補於世教必多  
矣嗚呼其意可不悲哉公先臨終盤腳整衣帶進子

孫戒之曰家世奕葉今雖凌替忠孝乃吾家青氈吾  
嘗淵冰於此若等須早夜戰兢勿忘曾子曰人之將  
死其言也善若公者可謂善終也已公五世孫鍾澤  
踔七百里來銘辭氣甚款叩其存優為公肖孫余嘉  
其意不忍辭銘曰

月城世閔南州望族宦替德修其業世篤公承厥緒  
不取時譽孝友為政經史蓄畚身心科宦孰內孰外  
孰輕孰重孰小孰大辨之在早立脚不差白首衡門  
惟德之懷侃侃松沙公稱不謬我撮其槩作銘詔後

成均生員李公墓碣銘 并序



余既為李君鍾澤銘其五世祖僉樞公之墓矣鍾澤之請並及於其曾祖成均生員諱集仁字重厚氏之阡義有取不敢辭謹按李氏慶州人其先有益齋先生齊賢治儒學大顯於麗自是至本朝簪紱相承逮縣監諱在仁懲戊午禍南下亦世有文蔭曾祖以坤祖錫屋即僉樞公是生三子八源萬源百源公以二房生繼長房本生母丁氏熿女所後妣庾氏建泰女也公以正宗乙卯十二月干支生幼不嬉戲自受小學能自謹飭長通經史尚及舉業又勤稼穡卒致饒前後喪皆哀毀墜一遵古禮而曰踰禮非孝

不及亦非孝也孝吾安能惟無違於禮心少安耳年六十四中哲廟戊午生員以不及榮親殊無喜色尤用力於先事凡祠廟祭祀石儀無不殫心經紀至於俯親無後者亦為之置田守墓嘗拜先墓見傍有古墓不禁樵牧公惻然使每歲斬草定為久規吾聞有陰德者天報以福公之子孫必昌大矣以當寧己巳六月二十八日終壽七十五始葬牟陽之雲谷後移茂長大榜飛川交坐夫人晉州姜氏父在元先公塋別塋于古沙面佳峽鷗鳥谷辰原男社榮女婿長澤高應淳公嘗曰謹獨不欺是畢生著力處又曰



經學與舉業非殊塗願不為奪志則不妨兼治又曰  
只讀書而不力耕子職有闕嘗構一齋於禮洞扁以  
四勿使子姓肄業而庠糧儲丹不吝於來學喜施與  
宗族姻婭之無資者皆待以舉火凶年饑歲賙恤鄰  
曲或至傾困而不少惜蓋公天賦仁厚而濟之以學  
問故能於物無所齷齪云銘曰  
觀公志其欲廣厦大庇者耶觀公行其非積善有慶  
者耶嗚呼百世之後覽茲銘者尚式刑

同敦寧金公墓碣銘

并序

公姓金氏諱衡鶴字令伯系出金海八世祖諱明福

始入明川子孫仍居焉今阿間社龍巖即其里也會  
大父諱胤鼎 贈司僕寺正大父諱泰錫 贈吏曹  
叅議父諱鳳浩 贈吏曹叅判三世追爵皆以公貴  
母金氏崔氏李氏公李氏出也其生以 仁陵壬申  
今 上庚辰用子侍從恩階通政為僉樞庚寅進秩  
嘉善拜同知敦寧府事戊戌正月干支考終于寢公  
性度莊重人鮮見疾言遽色早丁外艱哭泣之哀顏  
色之戚感動傍人奉偏慈問寢視膳不以異宮或怠  
五十年如一日及喪哀素盡情值忌日宿齋戎牲醴  
庶品務極洗腆以至俗節薦獻封塋時祀必身親蒞



之老而靡懈家素貧窶或炊黍不給而處之晏如苟  
非其義一毫不以取予恒言士農不可闕一非耕固  
無以為仰事俯育奉祭接賓之資不學亦何以知孝  
悌忠信之道而免於禽獸之歸哉且勤儉二字最宜  
著力而勤又萬事之本領不獨士君子有樹立者為  
然雖田舍翁起十間之屋致百金之產者亦舍此不  
得輒躬幹稼穡縱子姪遊學至其晚歲貨以萬計養  
極專城秩躋緋玉榮顯極矣而猶戒慎謙挹凡係自  
奉依舊簡朴收族恤貧應副如流躬厚薄人雖在僮  
僕未嘗有過分呵責列邑俸宰多聞風傾蓋並以禮

迎送於地主尤加敬謹曰是奉君命而致之民者也  
其可忽諸意到則時以角巾藜杖緩步觀稼于阡陌  
間怡然自適曰少時所理意所戀也蓋其忠信樂義  
貧不移志富不易操而安於素履者如此夫人邊氏  
籍原州考琴喆韓氏籍清州考夢喆男舜鉉叅奉過  
房元鉉禹鉉文科承旨過房女全州金應仁邊氏出  
喬鉉佐鉉道鉉部將邁鉉韓氏出叅奉男河璉今鍾  
城郡守女劉泰欽崔南淳武科金仁淳承旨男河璿  
生貞主簿女李容觀李秉文大明軾漢城判事金昌  
奎側室四男河璉河琰河琳一幼喬鉉系子河璉女



崔錫夔部將二男河璟次天一女幼邁鉉一男河璉  
過房女金秉禹二幼內外曾孫不盡錄主簿講不明  
不仁之戒狀其事行請余為墓道之文余病廢杜門  
無堪為役而顧千里重趼意甚懇至不容以不文辭  
遂叙次如右係之以銘銘曰  
金本駕洛偉人世出根蟠源遠枝派綿鬱暨于公身  
厥賦孔碩存以忠信行則儉約貽謨斯何邵南耕讀  
最所用力不誠無物此其大者餘皆可畧苑彼龍原  
有封四尺爰作銘詩永世不泐

鄭春灘墓碣銘

并序

河東鄭氏春灘翁周煥名順則其字 純祖庚寅生  
今 上丁丑卒葬在綾州富春面大峙負亥之原門  
人梁君在海圪為之銘銘曰

富春山水鍾氣淑有美一士温如玉孝親敬兄睦于  
族餘事功令修天爵木食澗飲視梁肉風雨長爭數  
椽屋玩意六籍老彌篤矧在青衿推三席曰有古道  
何不學鹿洞講規藍田約相世滔滔摠詐力誰為知  
已梁李朴隱几沉潛仁義域杖策盤桓山水樂四十  
八年守溝壑箇中真趣誰其識翩然一朝謝塵濁萬  
事悠悠都陳迹蔚彼大麓封四尺聊薦蕪辭警樵牧



李芝南翁墓碣銘 并序

不佞晚年得一會心友於千里之外一再往覆輸露  
肺肝如平生歡及聞逝去則殆盡然傷痛不能自己  
其人為誰光山李公贊鐫字東賢世居綾陽之蔓芝  
山下溝壑五十年雖不槩見宗族稱孝鄉黨稱悌有  
威儀善談論茹經服禮躬厚薄貴多人所難能者吾  
友日新子題其主曰芝南居士尤知為篤行君子人  
也銘曰

光山舊閣望著南服僕射以降世襲名德金馬玉堂  
甲乙巨族中罹大艱孽自己作晦養艱貞久矣不食  
公襲前光稟姿其特行本孝友濟以文識好善服禮  
蓋由彛秉鄉飲讀法先王所命中廢不振有識同病  
公能修舉始自鄉井行之不替用是究竟瞻聆彼暨  
可肅夫夫洋疇所迫萬事嗚呼公乃先歸達士增吁  
風流篤厚今也則無睽彼風麓衣履攸託我作銘辭  
昭示千百

柳塲韓公墓碣銘 并序

韓君愉以其大人命跋涉千里諭於不佞曰吾先祖  
柳塲公始終溝壑雖不槩見至其關係大義合有表  
章者百世公議不可誣也今距葬百五十餘年墓尚



無刻非特茹恨於子孫亦尚論君子所宜垂憐而裁  
擇也不佞再三辭不獲遂按狀而叙之公諱箕錫字  
東賚韓氏籍清州高麗佐命功臣威襄公蘭寔爲鼻  
祖歷麗迄我大官聞人炳烺史乘不須譜也燕山朝  
有副司直諱承利棄官遜于晉晉之有韓自此始曾  
大父諱夢參號釣隱以學行薦授 王子師傅不就  
大父諱時晦 贈承旨父諱榮世縣監 贈叅判妣  
全義李氏考義繇公博學善文章旁通孫吳歸宿洛  
建於紫陽書用力最專持論制行繩尺斬然安晚保  
鍊石許公輟鄭公相虎其貽善知己也 英廟初服

中外多士疏請尤春二先生陞廡八省響應而晉之  
人士類以爲此舉決非嶺儒所宜干涉萬口和附氣  
勢崢嶸公乃與許鄭諸公備述二先生學問道德之  
懿出處事功之正而因及其師友淵源氣像規模之  
大略首尾數百言該貫詳悉明白痛快不是羣減蠟  
起至有請斬韓某之榜時光輝徒黨分布嶺湖胥動  
浮言駭機日深公又會多士揚言衆中日父死子繼  
兄亾弟及此天地之常經今兇黨以無君之心做復  
讎之名誑誘列郡禍在眉睫吾等若因循蹉過同釜  
之魚恐難自脫因自袖中出疏本譏斥時相語甚切



直其文則成於安公晚保之手而其意則公實授之也衆論參差雖未登徹識者多躋之公內行甚篤居前後喜易咸備至事伯兄如嚴父及永感棄舉業不治日雖得算孰爲榮乎於是躬幹家務治田園蒔花竹以寓其趣暇則杖屨泓淨詠志觀德翛然有出塵之想晚構小屋於石溪之上有綠柳穆穆因以爲號有問者輒莞爾曰木之無取於柳猶人之無取於我也其安於素履如此噫嶺南自黨論以來公私混淆邪正相雜於懷尼之辨 建儲之義其不爲風氣見聞之所拘牽搖奪而免於胥溺者蓋鮮矣公以豪傑

之資篤信朱宋之道雖值羣邪文攻象正心死之日而能毅然自立自不失第一等義理豈非所謂衆流靡靡一柱亭亭者歟以辛酉十月干支考終于寢距其生 肅廟甲子壽五十八葬在夫火谷負坎之原配 璿派忠義慈女婦德克備先公八年歿墓各附男二長成郡守次師瑗女適士人鄭壑郡守男應濟應漸師瑗無育繼以應漸應漸三男啓泰啓益啓魯啓益玄孫曰擇東卽愉大人也銘曰

聖訓孔昭善善惡惡柔道所牽而鮮特立公姿磊落天厚厥植何以脩之朱訓是力褐衣藜餐而忘寵辱



若我秉執陰陽黑白有或慢漶天地閉塞扶倫衛道  
以正鄉俗遺風不沫刻此貞石

同中樞權公墓碣銘

并序

嶺之丹城縣西石岱山負坎而阡者故同知中樞府  
事權公諱思秉葬公以 元陵戊子生生三十七年  
而仕仕四十四年而卒卒五十三年而嗣孫秉時以  
鄭載老狀具書幣屬不佞以金石之任余重違其志  
不敢以病廢辭謹按公字時顯號竹窩安東人其先  
自麗太師幸始以及 本朝大官閩人譜牒相望七  
世祖霜巖諱濬師事鄭寒岡值光海昏朝有出處大

節曾祖諱壽鵬 贈司僕正祖諱翹 贈左承旨考

諱之中 贈叅判三世追贈以公貴也妣延日鄭氏  
源益女公世業儒行而兼弓馬之才 純廟甲子登  
武科積年旅邸介然自持未嘗為越趨足躡嚙口於  
權門勢逕人或勸納刺銓官輒應曰朮未必得得不  
得皆有命焉却無名之饋絕不正之人處已接物緝  
尺截嚴年五十七外除為雲峯縣監自奉儉約一如  
居家每新陳交際籍窮戶不能舉火者捐俸賙急上  
司符檄或有不便於民者輒委曲論報準請乃已內  
衙出機杼響子舍聞讀書聲于囑不行公庭如水及



遞吏民立石以頌之自是怡然歛退婆娑林壑日與鄉黨宗族歌詠 聖恩講服先德不知老之將至 憲宗丁未陞資嘉善以其年十二月干支考終于寢 享年八十公內行甚篤事親能色養居喪能盡禮臨 祭達曉不就寢鄉鄰有與先人同庚者歲首必具饌 徃拜嘗營京行賣田為資束裝才畢聞族子病且寔 無以為藥則傾橐而與之暑無見膚病不去巾所居 在聖廟墻下每春秋享禮望見香祝犧牲擔轎過門 輒正衣冠下階拱手而立竝入廟乃升訓子孫正閨 範門庭肅然盡日無喧嘩聲此其狀辭大槩而所云

即其外毅然大丈夫氣象視其行溫然謹飭士規模 者又約而盡矣是則公之行固皆焯焯可書至於居 官無枉已循人之私檢身謹知足知退之戒者其規 昏夜要津老白首不知止者高下得失又不啻霄壤 龍豬吁其賢矣丞夫人海州鄭氏考行毅完山崔氏 考承宅女鄭可人李敏新趙顯鄭氏出男亨夏女全 在膺崔氏出亨夏嗣子秉時生大煥進士銘曰

相世役役靡哲不異一涉名塗鮮保厥初唯公耿介 不為俗囿薄試牛刀內省無咎原公疇性剛毅正直 大槩如是餘皆可畧贅彼佳城繫公所託刻詞于石



用示于億

幽窩權公墓碣銘并序

嶺右士大夫冀北氣節也德行也文學也濟濟彬彬無遜於鄒魯洛閩之境至其言言步步祖述朱宋正大磊落蔚然爲士林標準者吾於幽窩權公見之矣公諱秉天宇惟一始祖太師幸以達權得姓爲權食采安東遂爲左海名閩九世祖霜岳公濬當光海昏朝有出處大節曾大父有中大父思璩父叙夏並有儒行外祖海州鄭齊毅敬夏光州盧氏其本生父母以純祖乙丑生卒於當寧癸酉塋在丹城治北

齋洞負坎之原夫人許氏祔焉公稟姿非凡自在童穉言語動止儼如老成及冠益自厲有過輒改見善則從讀書嚴立課程經子百家無不淹貫於尚書庸學用力尤專事親備志物居喪盡易戚上墓必哭如鄭松江故事奉祭祀極其誠處兄弟盡其愛閨庭之間肅如治朝諄諄於教誨子姪惓惓於教睦宗族嗜善如芻豢嫉惡如仇讎至若論議邪正嚮背從違便一刀兩段通明堅確有千萬人吾往之勇新安祠舊奉朱宋兩夫子像公瞻依咫尺讀其書求其道寓墓義壙如七十子之服孔子及祠毀公操文痛哭若新



喪師焉如致意於復 皇廟隳廳重建赤壁江孝子  
碑一皆出於無所為而為者自丙寅洋警以後每隱  
憂浩歎蒲酌酣歌當時蓋莫之測以今觀之公真先  
見也常謂學問氣節非兩件事貳之則不是以謂士  
君子立心一差便見坑塹不可不慎又謂事有成法  
依倣遵守尚患不濟其以自私用智而輒曰用權者  
吾所大惡也蓋公以陽剛之資濟之以學其制行之  
篤秉義之嚴可垂世範俗綽有餘地惜乎刺史不能  
薦天子不聞聲而坎壞以終也昔我華西先生有言  
朱夫子擔簣壁立泰山四個字終能成就大事業尤

翁亦以此四字重為末流之砥柱此四字吾儒之單  
傳密符公其有得於此者歟四男章煥通仕即煥  
三煥弼煥二女李在淑鄭邦潤載斗其家孫也克紹  
家學具書與幣使弟載奎重趼千里請豎碑之文遂  
依狀叙次如右而繼之以銘銘曰

石陵家德人莫或先誰其著者霜岳愚川公趾厥美  
砥礪風節矧伊陽剛天賦其傑光明灑落表裏洞然  
羹牆誦法朱宋大賢庶幾夙夜絕柔道牽世與相違  
樂我林泉生為善士歿垂後昆我述銘辭諒非毫言  
凡百君子視以式焉



權西洲翁墓碣銘 并序

士有讀數十卷書著書屢萬言其能瞭然於聖入教  
學之大旨本領者蓋亦鮮焉嶺之丹城近有西洲翁  
幼經筋躬到老彌勤每三復丹書敬怠之訓而曰雖  
日用尋常事少不著力便顛倒錯誤禍患隨起旨哉  
言真知要而守約矣翁諱章煥字文叟號西洲者以  
其在赤壁江西也權氏自高麗太師幸始勲業將相  
奕葉相承為左海名閥曾祖思際祖叙夏考秉天號  
幽窩俱以尊賢衛道為士友倡地益城許氏通德郎  
林女公丕襲前光聰穎異倫四歲能解文字及長自

知為學不煩課條每矜研索不得不措六經四子以  
及漢唐諸家如誦已言旁治公車精緻敏速輩行莫  
能先幽窩公性嚴有法度子弟有微過輒對案不食  
公起敬起孝務得其歡嘗患腫跨年牀第公小心洞  
屬左右扶將躬整床褥手泔廁踰雖造次急遽未嘗  
有絲毫幾微見於色辭幽窩公甚安之及喪哀毀踰  
度饋奠葬祭一遵經制兄弟盡友愛宗族致敦睦治  
家以嚴御下以寬鄰里死喪朋友急難力苟所及副  
應如流自奉儉約身不著華靡居不畜異物邊幅之  
飾不設於體睦眇之言不出於口發辭鄉試赴會南



省時科弊濫觴不以義得不以道甚於穿窬者潛  
滔也館入輩亦勸其隨時俯仰公正色折之曰得失  
前定吾志不可變蓋幼學壯行公志即然而自丙子  
納洋一變為壬午再變為甲申知世事之不可有為  
則輒退然自守用心為已至於大易懲窒之戒又未  
始不三致意焉總而言之其喫緊得力別有事在而  
為視履考祥之斷案不可誣也晚授 懿寧園守奉  
官享年六十三而卒於 當子壬辰遠近悼焉及塋  
引而送者百餘人塋在校村東麓負坎原配晉陽河  
氏慶縉女婦德克備二男載斗載奎克紹家學二女

沈宜璣李龍根載斗二子鳳鉉龍鉉銘曰

人皆有心其職也敬情熾欲率鮮不受病翁乃自修  
妙契厥旨親親好賢接物處已一是為準兄矣吉士  
在今則無古亦罕比我撮其蹟以論來撰

石林權公墓碣銘

并序

公姓權諱秉汝字洛見系出安東新菴諱箕夏之第  
四子也府使諱思穆納新齋諱似中處士諱翁其祖  
曾高三世外祖星山李佑民公以 純廟庚寅四月  
十七日生自幼不與羣兒戲上學不待教督能自劬  
書年十四丁內憂服喪盡禮一如諸兄事新菴公養



極志物務得歡心及喪哀毀甚絕而甦者再執制雖  
祁寒盛暑不釋衰絰三年不與婦人對面仲氏天逝  
有遺腹兒公辛勤愛育淨於已出叔氏託無母二子  
而宦遊于京公皆教養成立人無間言既而伯氏歿  
營產百務奉先諸節公躬自省當並有條緒其性根  
孝友篤於人倫有如此者常戒子姪曰飽食煖衣逆  
居無教聖人便呵叱以禽獸人而不學何以異焉賙  
恤窮乏如恐不及親族中雖不合意者遇其忌辰而  
告悶則輒施之不吝有窮而未嫁娶者必擇對而資  
給之以至家業不贍而無毫髮怨悔意是皆人所難

能者也嘗遊蕭齋趙公之門蕭齋甚重之晚而好學  
棄功令業一室圖書存心為已常慕退溪先生殖其  
撤院餘財而建尊德齋於郡治春秋講會以為常享  
年六十二而以今 上辛卯三月二十一日考終于  
石林書齋石林即其號也塋于宜寧定谷里廣石洞  
子坐媿檜山黃氏翼龍女生三男三女男長振熙次  
忠熙武科次佑熙仲季皆出后女適李炳台盧殷鍾  
李相昂振熙男載五出后忠熙男載春出后佑熙男  
女皆幼狀其族姪學士鳳熙所撰其辭有曰平生一  
任坦率絕無艱深險阻之意待宗族一於敦睦與人



文不設畦畛至核義理關頭截然有不可奪之操儘  
非阿私之言而益信公之為篤行君子人也銘曰  
仁義忠信而聖有言如公篤行孝為之源身備六德  
到老彌敦於乎君子終不可諉

松山君玩休齋姜公墓碣銘

并序

國朝節義唯 莊陵為盛世所稱六先生者固焯然  
與日月爭光其餘遯迹山林或棄官自廢又不知幾  
人顯晦雖殊不啻乎愛之理而有以為樹風聲勸世  
教則同余於晉山姜氏得一人焉曰玩休齋諱昇字  
子揚以高句麗元帥諱以式為鼻祖中世有國子博

士諱啓庸其子殿中內給事諱引文皆以儒顯給事  
曾孫諱君寶性敏好學登科位至宰輔封鳳山君謚  
文敬是五世以上高祖晉山府院君諱著謚恭穆號  
養真堂李牧隱為之記曾祖寶文閣大提學諱淮仲  
太祖御極屢徵不就號通溪祖諱安命孝行旋閭考  
諱純文科成均館司成妣金堤趙氏判書通元女公  
生而英俊十歲能通經史少師金江湖淑滋與佔畢  
齋及金東峯諸賢為道義交 正統丁卯中生員蔭  
仕由啓聖殿直遷內資少尹歷松禾大丘碧潼金堤  
四邑所在勸農業興學校值歉歲籍窮戶賑給有差



政清事簡吏溜民懷事 聞陞秩至嘉善其莅金堤  
則乃 端宗遜位之日也即授綬寓居榔北杜門歛  
跡書籍自娛 光陵御世念公治績封松山君固辭  
不受門人語及時事則曰吾不欲聞汝不須言或壹  
鬱慷慨至刮頰露筋嘗謂富貴利達自有定分非智  
力所可求所可勉者孝悌忠信禮義廉恥也苟或反  
是餘無足觀蓋其師友淵源持守梗槩有如此者享  
年七十二而卒于寢墓在松禾山負良之原享鳳樓  
祠性潭宋先生撰享祝有道源三隱志同六臣之句  
此實錄也配貞夫人全州崔氏司果列女墓合祔男

長邱生內禁衛次池生奉事堤生叅奉碧生進士玄  
孫仲虎以學行薦壬辰舉義官叅判號松齋後孫震  
馨日熙敬熙以公行歷重趼千里請不佞為豎碑之  
文噫公當邦命維新人心危疑之日能勇退急流沒  
齒無怨尤毅然有古節士之風顧其心豈有利害得  
失嬰乎中哉朱先生所云士大夫出處進退有關世  
道污隆風俗盛衰者寔為公準備語也所著有庸學  
辨疑人道心辨說家訓等書並說而不傳云銘曰  
晉陽之胃世閑蟬聯遙遙厥緒岸谷互遷博士以降  
文敬恭穆亦粵通溪益勵晚節公襲前光天賦孔碩



免雜錄  
觀變玩占志士取程古亦有訓內重外輕迹公之為  
庶幾無愧維身之否維後之社

壺山魏公墓碣銘 并序

壺山魏公諱河祚字贊寶年七十二以今 上辛巳  
二月干支考終于寢及塋引而送者數郡咸咨嗟太  
息言吾黨不幸善類亡矣嗚呼是豈無所致而然哉  
謹按長興氏在南服舊以詩禮聞遂行懿德世趾厥  
美其先唐學士鏡浮海東來仕羅封懷州君寔為鼻  
祖歷侍中菖珠監察御史澧中即將原補侍中尚書  
耆老平章事繼廷相繼顯在麗而平章諡忠烈配享

睿宗廟庭閣門祗候種當我 朝初自處殷頑杜門  
數世七世祖廷鳴有文章行義折券昏朝倡義南漢  
號騰溪享竹川祠曾大父諱伯陽大父諱道純父諱  
榮禹俱隱德不仕外祖平海吳斗寅公稟姿絕異自  
在幼年出言持行儕類莫能先長益刻厲經傳百家  
以及古今禮制皆誦數探索務得實用公車業乃餘  
事家法甚嚴事親夔夔雖非問寢視膳輒侍立終日  
罔敢或怠前後艱哀素盡情或杖而後起值忌日必  
齋戒致敬如見其所為祭者行步出入一不近市場  
城府雖地主聞風折簡非公事未嘗至其室好善若



不及憎惡如已病待子侄慈而能教御家衆嚴而有  
息時則梅山洪文敬公蘆沙奇先生于南于北分主  
丈席彬彬有洛閩之風公便慨然感奮或齎刺請益  
或聞風私淑所造益深持論不苟於陰陽華夷之界  
分路頭辨析截嚴一刀兩段無回互搖奪之意口不  
道非禮身不踐非義養性林泉樂而忘憂每風清月  
夜朗吟朱子感興詩武夷九曲招隱操聲甚悲壯若  
千載感遇焉是以鄉黨稱其孝友士林服其志節所  
在禮場及文會必推公為一相講長南坡李公氣槩  
簡亢於人少許可至公便實心推服始終無間然其

哀詞曰捷徑奔馳觀國賓憐公早歲作完人他年誰  
撰冠山誌壺谷端宜列隱淪者此便實錄也墓于觴  
山先兆負卯原夫人潭陽田氏命穉女端肅有禮多  
內助別葬桂陽先塋二男瓊植琮植一女清風金益  
魯孫男啓龍啓鶴女慶州金榮九南平文富鉉仁川  
李啓遠啓龍以其大人命請銘不能以老病辭竊惟  
公姿磊落固得之天植而又誘掖於賢父兄中心好  
善定文一時之賢猶以為未也尚友千古到老彌篤  
言行相顧理事交須吾夫子所云行有餘力則以學  
文者其公之謂也歟銘曰



人之生兮貴顯歿而埋者何限本不志兮榮達終窮  
乏而不恨惟古貌兮古道一片心兮亦古循始終而  
點檢庶不愧作仰俯

義禁府都事南君墓碣銘

并序

南君恭元字應瑞年四十四以 當子戊戌正月干  
支卒于宜寧居第之寢其葬艾山鄭載圭為之誌以  
納于壙其辭曰南氏自高麗密直副使宜寧君君甫  
始忠敬公在以我 朝佐命功臣官領相三傳簡官  
直提學又四傳振號秋溪學于族父秋江先生懲忠  
士禍避于嶺之三嘉三傳至宙始居宜寧曾大父命

薰大父斗五父啓鎮外祖綾州宋南溫君事親志體  
備養祭祀立廟主備儀物有一子甚愛而嚴少過不  
貸每遇飢歲賑濟得活者衆嘗旅京筮仕一命金吾  
郎既而悔即還鄉常感感如有失有問者輒曰一場  
醉夢何足追提戒濫守拙扁其居曰謹小齋然事有  
當為即為如不及或致悔吝內自訟焉雅好書承家  
應務雖不能肆力其心猶焯焯然至死不能已噫考  
實稱停儘可以不朽君矣君娶金海許氏考濬河濱  
李氏考賢三男廷稷女宋鎬臣許氏出也墓于本縣  
貞洞得所村壬坐原廷稷以不佞於鄭公為朋友之



列于里致意要一言以銘之竊念時運平陂人心陷  
溺包羞乞墜迷而不返者滔滔也君慷慨發省魯端  
方茁而天闕其年豈氣之清者數必局亦運化所關  
者歟可慨也已銘曰  
仁且惠宜壽反成志而篤宜亨乃室惟其有種後必  
有穫

南谷韓公墓碣銘 并序

公諱義達字宜徹自號南谷韓氏其先肇自殷太師  
箕子歷四十餘世為高麗佐命功臣威襄公蘭傳至  
禮賓尹連忠烈王朝奉使北關仍居安邊翼善坊寔

為入北顯祖三傳至諱卿密且副使封安川府院君  
即 神懿王后考安川五男第二曰劔右故丞諡良  
靖良靖曾孫諱愨登科官至三品 莊陵遜位引義  
不仕號龜隱高祖諱錫均 淑陵叅奉祖諱世俊號  
芝山考諱應麟世以文行著稱妣江陵咸氏公事親  
至誠日三起居執喪盡禮臨祭致敬昆弟四人友愛  
肫篤老而同居餘力學問講春秋尊攘之義服孔孟  
程朱之訓世外得失榮辱淡然不介意時則南漢熋  
成天地翻覆輒悲憤慷慨訓其子孫曰吾家流落遐  
鄉雖不著顯其以罔僕之淵源當茲冠履倒置之日



應舉覓官不亦恥乎汝等勿意進取惟從事耕讀敦  
行孝悌繼述父祖之緒業勿負秉彜之降衷是乃安  
身立命處也遂入山晦迹土銜薪燭擁書歡娛不知  
老之將至享年八十六而以顯廟己酉十二月二  
十四日卒塋于巴洞社紫芝峯下負良之原配羅州  
陳氏忠佐女有婦德墓附左生四男長起賢過房次  
益賢益三興三起賢男繼良繼真繼元繼亨益賢男  
繼貞繼雄興三取起賢男繼真為后繼良男慎榮繼  
元男慎逸慎清繼亨男慎榮繼貞男慎中慎恒慎儉  
繼雄男慎誠繼真男慎言慎敏九世孫道性奮起遊

服從師遠濠之上蓋亦有聞於華夷人歟之別者收  
拾公遺事問銘於余余幸得以反覆焉竊惟人家祖  
先莫不以禮義名教立得根基而數世之後鮮克嗣  
述今韓氏積德累仁雲仍數百年典刑雖遠遺澤未  
泯是可貴也銘曰

豐沛鉅族韓氏其一世述名義有文有質公姿磊確  
厥樹孔大溝壑本情風泉其志有鬱拱木式哉後儒  
我銘貞石庶云不謬

學生金公墓碣銘 并序

金公鍾鉉字夏圭居上黨白足山下生卒五十三金



氏籍清風簪組相承司僕寺正放孫別坐守虛堂瑀  
觀察使義之其十世若十一二世曾大父諱重九大  
父諱興魯父諱致健外祖漢陽趙性善公性根孝友  
居窶善養採薪負米視若分內式穀一念終始無倦  
有不言言必理到恒謂人昧於道理惟利是趨險逕  
危坂倒睛促步沒身不自覺者雖讀書萬卷何益於  
我且夫富貴或文字而驕矜者非只沉痾於子孫即  
其身鮮克免焉又云飭躬操心接人應事當十分謹  
慎如履洲水平居未明而起淨掃室堂勤勞稼穡凡  
異國物產間巷雜技不近身手家無營產辦置一

園有古墓躬親禁護撫恤孤博替勞斑白多人所難  
能處此其狀辭大略也噫人或終身役役在文字之  
間而不能以一言一行裨補世教者多矣若公之言  
之行雖甚寂寥苟表而著之教條之列則亦可使頑  
夫知警薄夫知愧矣是固君子之所樂道也黃學士  
章淵狀公行頗詳公之嗣兢淵持而來請銘按公塋  
佛堂乙原齊寧海朴氏兄榮女二男長即兢淵次益  
淵孫男東瓚銘曰  
寬廣坦夷不事矯飾一辭稱善鄉里親戚平生言行  
可裨世教銘以著之有子能孝



箴齋慎公墓碣銘 并序

士患不知學既學矣知所擇之為難能擇矣而勇足以行之內不顧於己私外不牽於俗務為又難也若箴齋慎公在巘字致龍者殆所謂知所擇而能行之者歟乃不及一試而又無年以歿使人不及見其德業之所成就可惜也已公自幼穎悟長益自厲一叅鄉解不售有司既而覺此外又別有一段事在贊見梅山洪文敬公於鷺梁江上先生叩其所存深加獎詡贈詩有前程自有奇觀在努力工夫願日躋之句自是充然若有得不事進取反充益力顯顯聲聞蔚

然為士友推重其居家夫妻相待如賓未曾見褻語慢容遭艱盡制暑不釋衰朔必展墓臨祭致蠲潔門庭肅然如見其所為齋者自奉簡素服食什物取其苟完至窮戚貧友之不能自食者與夫過時不及昏葬者並隨力飲助肫肫若未及教子不溺愛御眾必先恩長於善善而短於惡惡此其狀辭大畧也卒於哲宗乙卯九月二十三日得年才三十一士類莫不哀之臨絕無它語但以二庭偏慈之不克終養為深恨塋在居昌縣古蘓洞甲原慎氏其先出自中國以高麗左僕射修為初祖屢傳至諱仁道入我朝為



戶曹判書是生諱以衷右贊成是生諱幾戶曹叅判  
四傳至諱權有隱德號樂水士林俎豆三傳至諱榜  
號東礪疏請沙溪先生從祀寔公五世高祖諱守沉  
教官曾祖諱復明祖諱性烈考諱必璜孝烈文行世  
趾厥美如性潭剛齋錦谷梅山諸先生各有叙述可  
傳之來世外祖昌寧曹德明諱必璜星山李氏進士  
奎漢女其本生父母夫人昌寧成氏在鼎女墓各封  
三男長炳道次炳淳炳世炳道男宗極女適魚命翼  
鄭達源全近祖炳淳男宗軾女適曹岐鉉河宗珣炳  
世男宗祥女適洪淳貞沈鎮烈餘幼炳淳早孤力學

克述家聲以狀請銘於蓋鉉不容以病廢辭銘曰  
謂天畜之則曷其賢且志也謂其德之則又不年以  
位也諫善人之必報也偉克家之吉士撫遺迹而尚  
論芳庶幾不以爲媚

雙峰柳公墓碣銘 并序

當寧三十八年辛丑正月雙峯處士柳公炳基字周  
逸卒于晉山居第之寢距其生 純祖甲午壽六十  
八既塋諸孤等謂吾先子始終林壑雖無槩見不可  
使邃行懿德屬於泯然而陷不明不仁之罪也乃以  
昌山曹垣溥所述狀北走數百里屬銘于不佞謹按



柳氏文化人以麗朝大丞車達為鼻祖屢傳至文原君泗始居晉晉之有柳始此曾大父醜壽大父壤父之昂俱有隱德外祖南平文在顯公稟姿磊落立心行已務敦本實孝友天植養親志物兼備壻盡哀祭致敬處諸從昆季篤恩義爭叔母如母供養無闕教子女有方敦宗族信朋友見善若不及聞惡如已病持家謹嚴外內無間言不近巫祝門無雜客值丙子大歉有一夫妻率一女來欲依託為生鬻其女仰役翌年夏夫妻還鄉俱歿女年才十餘常舍羞不肯出外輒哀其情不使之賤役教以女紅及笄欲擇人嫁

之其女不欲曰女雖無至親有內叔存焉苟蒙愛念還鄉是願遂使人探召帶歸之聞者皆難之夫人延日鄭氏宅基女有婦德男長永吉次渭吉英吉鳳吉即請文者姜永祚韓佐源鄭斗教塔也內外孫若干人銘曰

聖人謂質勝文則野至如用之則曰吾從先進蓋惡其以文滅質也猗公終始善信其德刻辭于阡昭示千百

贈兵曹叅判朱公墓碣銘

并序

顯宗乙巳老峯閔文忠公觀察關北 啓請壬辰丁



酉立功死事者二十人或追贈官職或子孫錄用或  
田結復戶爲固結人心之本而出身宋公應武乃二  
十人中一也 英廟乙丑因廟堂回 啓始 贈兵  
曹叅議後又加 贈至兵曹叅判享岐谷宋地兩鄉  
祠塋在東溟社西湖之麓公自少慷慨有氣節壬辰  
義舉多有勞績丁酉再變朝廷以自募從軍中擢其  
尤者定別將前進討賊事行會於是柳公應秀以勸  
武應召爲別將衣 御前賜酒馬以優之柳公又募  
咸興人如徐敬忠朴應崇李大命等與之俱公以忠  
勇絕倫爲副將轉戰嶺徼所向克捷至慶州花院地

柳公乘勝輕賊不覺深入險中馬蹶泥濘偵倭猝發  
中丸而死公代爲別將不勝憤奮激勵卒伍凡千餘  
戰大捷于海濱斬獲甚多幾使隻輪不返旣而水營  
將強邀宴飲曰海濱賊畏公道走餘不足憂也公率  
十餘騎從飲歸路遇賊竟以身殉距其生 明宗戊  
午年纔四十噫壯君難忠也死王事義也旣忠與義  
復何求哉公字武叔考世鵬文學名世祖信德副司  
正曾祖石柱上護軍高祖尚禮牧使妣密陽朴氏奉  
事玆其考也齊 贈貞夫人清州韓氏二男大誠大  
詢並叅奉大誠男汝義汝智並叅奉汝信汝貞並將



仕郎大詢男後尹後說後颺後呂自餘內外雲仍摠  
千餘人云十世孫寅點以門父兄命持韓寢郎序教  
所述狀千里重趼問銘於余不容以病廢辭銘曰  
朱氏其先晦翁夫子夫子曾孫清溪學士浮海嘉遯  
于彼綾城竹樹文節世襲公卿亦粵典書帶礪參盟  
芝根醴派厥理孔明公際急難視死猶生 列朝褒  
典百世風聲我辭非誣昭示子齡

贈司憲府持平趙公墓碣銘

并序

粵在 穆陵之世能兼道學節義文章者惟重降先  
生為然同殉於錦山之役者七百人焉而學其學

死焉而同其義者莫忠於趙公亦其一也後孫壽民  
抱公從曾孫克謙狀德之文走四百里謁墓銘於不  
俊不俊辭不獲謹按公諱汝寬字士弘慕忠其號也  
趙氏系出王川以高麗門下侍中璋為上祖侍中生  
洪珪官版圖判書判書之子徐孫元吉皆封王川府  
院君元吉五子瑛居長麗朝判書入我 朝 太宗  
以吏判師傅屢徵不起文正言士淳縣監淵教授彭  
齡叅奉應堅高曾祖考四世也公生而氣像儼整志  
節慷慨清謹忠孝根於天性受學於家庭七歲通孝  
經署朱先生若不如此便非人子八字於其上志學



能以敬律身年二十餘就正於重峰之門先生知其有大節嘗語人曰國將有難能死於節者必此人也一日侍坐會有天變公乃太息曰此兵象也十年必應先生竒之自是餘力讀兵書習弓馬讀史至忠臣烈士立節處未嘗不激昂慷慨及至壬辰之變三京連陷大駕播越公從重峯起義作赴敵歌以見志有為君死節戰場白骨斬敵懸樹歸事聖主等語檄文又有大義與春秋同行壯節與日月爭光之句今讀其篇猶令人凜凜有生氣其鼓動士氣得人之死力可知矣後重峯二十日而殉計前後斬馘為五百

餘級公第汝誠同在錦城有日記一通詳載其事

萬曆乙巳特遣御史按問蠲徭給復 純祖己卯以

儒生上言 贈司憲府持平汝誠收斂公齒髮葬于

淳昌赤城面東亭後考墓右負子原配 贈令人南

原尹氏舜成女墓合封初公之赴義也顧謂夫人曰

君方有身而兄無嗣幸而生男俾續兄後以奉先祀

夫人泣而許諾公果不返而子義孝生遂入為伯父

嗣義孝痛父不返且無嗣追服公喪三年有司以聞

命旌閭嗚呼壬辰禍烈矣然所以致中興之功而恢

復我疆土者實賴義兵為之倡耳目今箕封全域盡



免者真  
陷為夷生民之禍不止如壬辰而已安得如公者十  
數人置之方面一舉而掃清氛穢也乎遂歎息而為  
之銘銘曰

節義藩籬自道學來惟此活孝靈籙再開縞素討敵  
敵亦知畏天何不助火發風外馘至五百何功之有  
中興基本蓋亦有自所在致死於師於君戴記一言  
於公可云百世風聲頑廉懦立凡我君子視此刻石

左副承旨慎公墓碣銘

并序

當子三十四年丁酉二月干支前通政大夫承政院  
左副承旨丹士慎公考終于安義居第之正寢距生

憲宗疾子壽五十有九臨命語不及身後事唯以未  
報國恩致眷眷焉噫是可以聲音笑貌為哉公諱炳  
佑字夏瑞慎氏籍居昌譜自高麗左僕射諱修始左  
贊成襄烈公諱以衷為八我顯祖樂水齋諱權就開  
堂諱守彛並師友淵源俎豆享之是十世若五世高  
祖諱認胡文科檢閱曾祖諱性真承旨孝行旌閭祖  
諱必寧階通德考諱益九妣昌寧曹氏通德彥明女  
諱在馨孺人河東鄭氏其本生公家世為儒文藝夙  
就以庚午三月擢明經甲科筭三例授六品職為  
靖陵直長內移司憲府監察陞持平尋為司諫院正



言丁內憂服吉除弘文館修撰時甲申十月 上為  
沐孝等五賊所逼有離宮之厄二三勲戚駢首致命  
近密諸臣類多離次公拚死向前造次急遽不離公  
所聯啓討逆風儀峻整歷數日而事定尋以扈從勞  
加通政為右副承旨至左副歷禮刑工兵曹叅議  
陵幸隨駕瑞愍室侍衛並蒙表裏之典壬辰十月以  
未經外任 命除楚山府使旋謂其遠於家鄉改授  
樂安郡守蓋異數也時歲適大侵重以東徒煽亂民  
皆荷擔一省無完邑公至則善災政捐殘廩設鄉約  
振文教行之三年習俗丕變闔境晏然及其遞歸垂

髮戴白歲攀轅遮路至不得前其實惠厚澤入人深  
者如此於是入德裕山中結歸來之亭等樂善之臺  
墾菑畚耜祀菊枕藉書史嘯咏風月若將終身焉蓋  
自丙丁以後人歟雜糅禍亂日尋馴致甲乙大變而  
天理民彝無地可講則公之進退抑可謂與時消息  
而不苟合者歟塋治北月城負午之原淑夫人安東  
權氏監察琬女有女士行男長宗薰進士次宗式金  
思島進士權哲熙都事二壻也狀是公從父弟炳滄  
所述質而少文尤見其法家規範遂叙次如右銘曰  
顯允襄烈文武吉士垂休種德奕世趾美樂水清名



就閒實學根深未茂厥報靡忒猗公踐歷揔自 聖  
渥天方步艱海氛充斥五凶連肚敢讎 宗國事屬  
倉卒衆皆避易扈 蹕聲罪而公所獨并旗堂陣百  
世可質停峙鸞鶴第程爾後託在貞珉吾言不朽

六友堂崔公墓碣銘 并序

蘆嶺之南乾芝之北里名乾洞土厚泉甘俗尚淳朴  
故有不愠齋崔公以邃德懿行不求聞達隱約以終  
遺韻餘馥至今為士林傳誦公其玄孫也家法謹嚴  
事二親生養喪祭克盡孝道兄弟六人列屋連墻計  
口并耕度身同織服食器用無間物我墳麓湛樂教

課子孫蔚然有張陳二氏之風時則性潭宋先生教  
授懷川之上所以自為而為人者不越乎仁義忠孝  
之實叙秩命討之顯士之遊其門者如羣飲於河各  
充其量先生手書六友堂二字以寵之且教之曰如  
兄能友其弟而弟雖不恭其兄兄豈可學弟之不恭  
而遂忘其友但當盡其友而已如弟能恭其兄而兄  
雖不友其弟弟豈可學兄之不友而遂忘其恭亦當  
盡其恭而已蓋嘉其所已能而勉其所未至也噫以  
草野韋布之微得儒門一言之重以表顯於世者豈  
易易哉公諱民濟字士安系出慶州以新羅侍郎文



昌侯孤雲先生為始祖歷麗迄我世有簪紱通德郎  
應漢允齋尚榮 贈戶曹叅判天挺考祖曾三世妣  
利川徐氏生 英宗癸未卒 正宗丁巳墓在郡東  
霽堂山未坐夫人王川趙氏考恭和墓各附子樂善  
樂峻樂潤樂中二婿房心煥洪益燮曾孫基弘好古  
愷悌以狀來請銘銘曰

文昌故家蓋多令德六友湛樂古鮮其匹潭翁大筆  
有光千億蔚彼佳城霽山之麓刻辭阡途警示樵牧

松谷柳公墓碣銘 并序

晉陽治南距三十里村曰冥鴻宅幽勢阻溪石鮮潔

中有學圃齋謝鹿臺考槃巖諸勝故處士松谷柳公  
歌哭於斯誦讀於斯聚族於斯享年五十九以 肅  
宗乙未三月干支卒塋垂二百年墓無刻後孫等相  
與言曰不可使後人不知是祖之宅也將立石以表  
之問銘於余謹按公諱世彰字晦仲柳氏文化大姓  
名節勳業炳載史乘 國初左議政曼殊死芳碩之  
變議政二子長原之商議中樞院事 贈吏曹判書  
判書孫自潛文科監察 端宗遜位刻髮入首陽山  
晚移西山以終監察五世孫澍光海癸丑以副司直  
疏請造認偉卿等罪次殷之知中樞院事都摠制



贈領議政封文城君文城子泗 世祖朝誅李施愛  
錄靖難功官至工曹判書封文原君文原六世孫忠  
義衛謚取司直笏二子軒一為後副司勇生諱禧武  
科配載寧李氏宣教即玄根女有二子長世章官至  
縣監 仁顯王后離宮時日賀米三升威布囊書諱  
封投進墻內及復位特訪進米者不告姓名公即其  
次也公早喪怙恃養於庶母以善良稱及長以幼不  
能服喪為深恨因考諱日追製衰經攀號叫擗一如  
程括結廬墓側朝夕饋奠晨昏拜哭三年不懈有飛  
雉八幕山獸送死之感時人以詩嘉之有飛走自來

供祭需魚躍筭坐可並言之旬制除又欲追喪毋夫  
人伯氏呵之曰獨不聞毀瘠傷生謂之不孝者乎公  
遂意沮不較而未伸之痛至死不渝伯兄遊宦京師  
兄子尚幼公代理家事朔望參謁及四時祭以至先  
塋省掃視兄在時尤謹奉立嫂甚嚴夜行必以燭晝  
無侍人雖有故不入中門御家有法度老少男女朔  
望有會食之儀晨夕有祭問之禮與夫人敬待如賓  
出入必相拜教子孫必以小學為先與梁春窩天翼  
辛洗馬夢參友善每相見講磨道義商確古今或至  
達朝聞親知之喪必一日食素鄰有喪雖賤者亦如



免集  
之襟懷踈曠凡域內名山韻水與凡先賢杖屨經歷之地必極意搜覽淘瀉性情有翛然出塵之想公素性恬淡不屑科舉一柱古道立心以不欺爲主行己以實踐爲本平居莊重深衣大帶動止閑雅凡鄙俚淫邪害吾德性者未嘗留於聰明自奉簡朴屏絕華美見人之惡未嘗顯斥稱人之善如恐不及處事接物不露圭角至若斷以義理截然有不可犯之色每清晨整容危坐誦易詩書禮記數篇孔明出師表文山正氣歌非甚病未之或廢此又其氣象風韻之大槩也噫卽茲數段而反覆想像則蓋其自少至老言

行相顧事事理會念念照管不欲置身於非禮不敬之地者可知也 英宗乙巳鄉人士以行義聞于朝命復戶夫人密陽朴氏煇女有女士風子男四人湜僉知潑漵澈女三人適梁鎮瀛河漢經鄭道東孫男九人鳳壽萊壽翼壽龍壽恭壽壁壽參壽奎壽軫壽女七人適尹勉時朴權淳姜瑜趙希源李如瑛鄭樾鄭有晉曾玄不盡錄銘曰

文城舊閭世食其德松翁式敬敦本務實根深末茂  
慕慕第祿有降者魄宅茲鮮原我管非謬昭示百千

姜義士墓碣銘

并序



汪崎一童子耳能執干戈以衛社稷則孔子誨之以  
勿殤余於義士姜君 秀竊有感焉君晉州人始祖  
隋元帥諱以式征東不返自麗至我世輝燁政堂文  
學諱淮伯知敦寧諱願德左贊成文良公諱希孟最  
著贊成子諱鶴孫司評司評孫諱益舍人於君為十  
三世祖五傳而至夢澤官察訪自是以後陵替不振  
高祖諱德老曾祖諱斗賢祖諱載吉考諱達永妣密  
陽孫氏喆祖女以 憲廟丙申五月五日生君於河  
東之花開洞三神里第自晉而泗泗而河自其祖考  
始歲壬寅夏余作南嶽之遊君之弟琮秀袖其兄殉

節文券訪余於雙溪之八詠樓謁其碣銘謹按多士  
之狀有曰為人寬裕有度慷慨有節其事親也極其  
孝鄉里歎慕之至甲午東擾知郡逃躲聞帥迎賊君  
乃以本面民砲統首痛憤時事與進士金澄秀由吏  
鄭樛斗為之倡擊走其黨謹守郡堡時湖南東匪勢  
益漲欲踰嶺擄掠而以河東防守不得肆嘯聚厥黨  
必欲踏破措劃非不申嚴而內無城郭之依外乏虀  
蜚之援四面鐵桶一身屢校竟至陷敗被獲脅之使  
降君高聲大喝曰汝亦五百年聖化中物敢為千萬  
世無道之賊乎汝若殺我我為厲鬼必殲滅汝等罵



不絕口而同金鄭見宰烈哉實是年九月五日也後  
一望其弟琳秀歛骨歸葬於村後艾山鄭君載圭作  
詩悼之曰一死挺身辨亦能壯義聲蓋亦有聖人不  
殤童疇之義也君娶晉陽鄭震煥之女生一男一女  
男大灝女完山李吉善孫男允中曾孫皆幼銘曰  
匹夫而死於郎方宰相連帥之渥也志士仁人之恒  
也

寒溪處士鄭公墓碣銘 并序

寒溪處士鄭公諱相元字舜卿海州人以高麗侍中  
肅為初祖入本朝左贊成易贈領議政謚貞度

公既直提學戶曹叅議漁隱公希儉與兄希良知有  
甲子禍俱遯世歷數世至文孝壬辰有靖難鬼勳癸  
丑有扶倫太節贈左贊成謚忠毅於公為高祖曾  
祖大榮生員贈執義祖有禎贈承旨考懋妣順  
天朴氏宗燁女以肅廟戊午正月四日生公於晉  
州之佳湖里第穎悟夙成自七歲已讀小學書能知  
男女之別不與姊妹同席見者異之稍長事父母甚  
謹日必辨色而起盥櫛詣寢所候其安否終夕不離  
側怡聲下氣恪謹執役凡所以忠養而順適之者無  
不極其方雖夔寢房治烹飪親自照檢而不委婢僕



食進則必默數其匙箸多少以為憂喜節山海之味  
有適親口者買之不計直非甚病不敢以儻色見其  
出外必先期及面曰恐勞門間之望也及其連丁內  
外艱羸病濱老而猶不脫衰躬執饋奠四載居廬足  
不及中門服闋夫婦始相見則鬢髮皓白矣家素貧  
賣園竹以供祭需庚戌大雪南土竹林盡枯而公園  
所植獨無恙人謂之孝子林壬辰大水沿江人家多  
漂沒浮屍蔽江而下公惻然募僧徒收而瘞之人服  
其義戊申亮亂子弟請避兵山中公揮涕曰國家有  
變義當執戈赴急吾雖殘病不能辦此豈忍舍丘墓

祠堂而雉兔逃焉與其妻權氏詣廟庭相誓曰賊若  
來逼此其死所子不知從容堂故事乎晚年以風病  
沉痾每噓唏語人曰望八之人死亦何憾但以久廢  
省墓為未死之恨盖有感於淵冰之戒也甲戌正月  
十一日戌時考終于正寢壽七十七遠近人士皆曰  
君子亡矣三月某日墓于州南柘谷庚坐原配安東  
權斗老女先公二十七年卒與公同原而異墓有一  
女適宋命傳無子子相展之子睦娶清州韓相琦女  
生二男四女男長克毅次在毅女坡平尹勉欽晉州  
河鎮億延日鄭煥斗安秉權思學生員曾玄不盡錄



公天資近道濟之以學問篤尊栗翁要訣尤致力於  
文公家禮參以儀節及我東諸賢之言折衷經變為  
一家之禮士友多就正焉公嘗與人攜小酌遊泉石  
間或傳 上侯不豫即撤席而歸憂形于色又題立  
春帖曰泣向東君訴一言此生於此曠晨昏須將地  
下平安信歸報阿兒枕上魂此可以見公之至誠矣  
今七代孫朋錫介其族兄前府使圭錫請所以題公  
墓者謹就權公震應所撰狀而畧加櫟括如右遂為  
之銘曰

平生尊閣小學家禮實踐不怠是活孝第今世何世  
入歟文戰我著公德用示久遠

靜齋李公墓碣銘 并序

公姓李氏容允啓玉其名與字系出驪興高麗仁勇  
校尉仁德為鼻祖七世有鼻號忘川翰林提學當麗  
末退居水原 太祖屢徵不起 列聖侑祭傳至說  
執義賢孫 莊陵遜位遷居嶺右之丹城孫副司直  
鸞又移咸安子孫因居焉 明 宣間有與鄭寒岡  
趙澗松相友善者曰益亨號杜谷時仁弘誣斥晦退  
二先生將推公為疏首公大言叱責竟至坎垓是生  
景蕃號三悅堂俎豆旋閭寔八世若七世曰寬慶曰



萬祚曰運哲曰明新壽資僉樞為四世妣淑夫人晉陽姜氏廣州安氏考景參生四男公其長也始公家甚窶難為養與仲弟約曰幹蠱事育我當自力讀書顯揚君其任之乃身親耕稼勤儉節縮克欣家業可口之味適體之物莫不畢給與諸弟居異宮連墻服食器用無間物我及喪哀毀盡制墓距家數十里朔望必展省不以雨雪或廢年六十七值內艱執禮彌篤不酒肉人多謂七十唯衰麻在身飲酒食肉禮經所許君何固執至此公謂記疇云云慮或不勝喪而有滅性之舉也自量精力優可堪忍不必然爾聞者

莫不動容薄於自奉篤於奉先凡墓塋石儀齋舍綽楔之從前未遑者類身自擔夯無絲毫矜銜色見世之以賄賂干囑應舉覓官者若將浼焉嘗言與其冒廉而求進寧守分謹拙不墜家風之為十分寡過也遂結數椽於鵬上谷水石間蒔花種竹觴詠自適榜曰靜齋又引沅階前名曰洗耳泉此雖尋常自道之辭而其實有可言者蓋動靜無端勞佚相仍動之不能無靜猶靜之不能無動也然靜無資於動而動有資於靜故聖人教人常主於靜是則公之持身處物蓋亦知要而為一生受用之地者不可誣也享年七



十五卒柁今 上癸未塋所居後負坎之原從先兆也夫人順興安氏考佑權咸安趙氏考恭徵並先公歿墓各祔無育取季弟容元第二子鍾坤為嗣克述先美娶海州鄭柱教女生三男三女男長珍九餘幼金海許萬海咸安趙鏞洛婿也一女幼銘曰人有是心仁為之德孝友睦姻此其大節蹟公終始蔚有可述肖孫克家未艾之福

士農窩河公墓碣銘并序

內而賢父兄外而嚴師友人之所以有成也若士農窩晉陽河公其內外淵源之胥自皆可書也公之先

有若滄洲公諱愷私淑於南冥先生文章道學為世推重有若生員公諱洛受學于尤春兩先生有若習靜公諱應運之志節教官公諱鎮兌之孝行皆名聞當世公之師有若性潭宋先生主盟斯文有若鏡湖李先生專門禮學若鄭公國采趙公濮李公基普皆一時名勝其友也教官公娶晉陽姜氏翰女以 英廟丁亥生公於晉州丹洞舊第公諱益範字叙中士農窩其號也髫髻已有成人儀度既遊潭門一遵繩尺至於名理肯綮經旨纏繞亦皆往覆論難剔抉窮數而有大學講義一卷又從鏡湖凡疑文變禮無不



討論辨質鏡湖深與之與人書曰某所次輯家禮增  
辭河君之助為多云嘗入場屋見舉子奔波歎曰此  
豈士子發身之道乎遂廢公車業退掃一室左圖右  
書不問門外事囂囂然自樂者數十年如一日教官  
公嘗侍母夫人病目不交睫者或至三四旬而公必  
侍立晝宵左右奉承未嘗或懈及教官公疾病亦以  
教官公之所以事親者事之丁憂送死居喪一遵禮  
制雅好佳山水於先賢遺蹟之地烈士成仁之處必  
窮搜歷覽以致其曠感焉歿于 純廟癸酉十一月  
一日壽才四十七葬于州北論水谷辛坐原配密陽

朴氏春權女後公三年歿生三男二女男長慶天次  
慶縉女適鄭彥民李觀慶慶天男一源出為從祖叔  
父慶汶后女適金基溥慶縉男奎源復源奎源承伯  
父后女適權章煥彥民男邦樺邦纘邦瑞邦式邦淇  
也曾玄不盡錄玄孫宗植祐植抱公家狀誌于余曰  
吾祖之潛德幽光足以垂後而墓道未有顯刻願丈  
人特賜一言以不朽也嗚呼余既撰公之曾祖習靜  
公墓表其世德淵源淺者固已望洋而謹書之若以  
一言為公寫真則生也後奈公何按當世稱公者或  
曰剛毅慷慨或曰溫良愷悌惟其稱之以剛健之姿



濟以柔遜者其於知公幾矣繼之以銘曰

孝惟根天學則為已何處得來魯有君子厚積薄發  
天畜其年我銘匪謏昭揭于所

雲塲趙君墓碣銘

并序

嶺之咸安有以豪傑奇偉之姿有慷慨志節眾皆推  
重以需世適用之器而遺說不售者雲塲趙君性瑋  
字聖執其人也乃以年五十六卒於 當寧三十五  
年戊戌五月二日隣里鄉黨皆哭失聲如悲親戚及  
輶輓誄而送之者數百人噫是豈可以聲音笑貌為  
哉趙氏出自高麗大將軍鼎 莊陵進士謚貞節公

漁溪先生旅其十四世高祖基元曾祖鎮洪祖恭淳  
考達植外祖載寧李有幹君幼而聰明耳目所經輒  
記不忘長益豪勇更折節為善八歲而孤饋奠哭泣  
能如成人祖母及母夫人哀不自勝則每繞膝寬譬  
承歡而止十四丁內艱為前喪幼不克盡情附身附  
棺務極其誠服闋旬管內外事訓家眾御臧獲皆有  
矩繩賓友往來戶屢常滿而左右酬接各盡其歡嘗  
觀光漢師見宰相不下士政出非其人即拂袖還鄉  
日與俯近賢士友迭相往來或經禮答問或詩酒淋  
漓意想超然值歲歉傾庫賑給至踈族泛識賴而全



活者甚衆縣官道伯多聞風致意莫不以爲山南有  
人甲午賊變乙未剝令寶華夷入獸之判君致意同  
志友若南黎許愈艾山鄭載圭論三綱淪矣九法斲  
矣麟虞不可與豺狼同羣清源豈肯與濁潦混流首  
尾數千言以洩其憤蕙壹鬱之氣義將盧應奎書邀  
再三欲與同事則曰兵以義名須十分無欠闕處方  
是旣而晉兵敗其秉心堅確臨事審慎如此君痛結  
風樹移之事叔母晨昏問寢朝夕規饌無敢少怠撫  
養從妹擇婿豐貲而嫁之孤甥無託收養而成立族  
親遭癘者省視無人則親爲救藥代遠墓祭豐其不

給歲久先亭修其頽廢嘗訓子弟曰吾常病性氣過  
剛未能克治此乃不思之甚自用之過也友勝已則  
日進於高明我亦齊於人友不如已則日就汗下我  
反不如人汝等戒之將構一小屋於紫陽山下奉晦  
翁像朝夕瞻依聚徒講習如滄洲祠已例有志未就  
其愛好人倫恩義兼至而篤於尊賢者又如此至若  
幼年打美郡吏氣沮山逕要衝東匪斂衽與倭相接  
特之爾汝而莫之敢撻者尤見其精神氣魄迥出人  
數等非常調凡夫疇可彷彿而擬議也墓在家後負  
寅之原娶海州鄭氏德女忠毅公文孚後卒先三



十二年再娶全義李鉉周女育二男一女皆鄭出男  
長映奎次彰奎女適文河盧銓甲內外孫男八鏞九  
鏞洛長房出餘皆幼映奎文行克家述其事請銘於  
余不容以老昏辭銘曰

紫陽山色碧嵯峨有哲一士稟姿特貞節節度忠孝  
閱炳然壯心著絕筆北望暈星迷夢際南來扣楫正  
流中間歇泊終何處氣士當今愧不窮讀君之詩  
論今世後人其識君之衷

贈祭議愚齋金公墓碣銘 并序

人或有享富貴老白首而一言之幾乎道者蓋亦鮮

焉扶安金氏世居帶方近有愚齋公善養父母便身  
之物適口之味靡不畢給疾革血指延三日命既窆  
雖大雨雪必展墓嗜書若芻豢手不停披篋瓢屢空  
處之晏如言無嬉戲色不疾遽待人溫良持身廉潔  
常訓子弟曰人所以為人不外乎孝悌二字苟以是  
為立身之本則仁義禮智自在其中堯舜之道孝弟  
而已者政謂此爾噫言近指遠雖質之古人而可無  
疑矣公諱翼相字雲舉生平皆已巳金氏系出新羅  
敬順王遠祖高麗名臣文貞公諱堃至我 宣廟朝  
有諱益福文科靈光郡事丁酉倭燹死節于任所諡



忠景是生諱澤蔭軍資監叅奉號在澗堂生諱之純  
號卷巖 王子師傅丙子舉義 贈臺職是八世以  
上高祖諱啓明曾祖諱圭文祖諱遠鎮考諱漢宗妣  
全州李氏可哲女葬在本府昇蓮村西麓 當子戊  
子 贈監察壬辰加 贈叅議 命旋間云齊南原  
梁氏秀曄女繼配羅州林氏濠鎮女墓並各祔育四  
男一女男長永述司馬叅奉次文述潤述在述女適  
士人許溶永述男炯式炯圭文述男炯台女適進士  
金在洲士人申寅訖潤述男炯九炯斗在述男炯錫  
炯萬炯式男連詰壽詰餘幼文述年今六十有四扶

老間闕丐豎表之記尤見其孝思之無已也銘曰  
有山蜿蜒有丘穹然於千百年知其為愚齋金公之  
阡

贈吏曹叅議李公墓碣銘

并序

懼窩李公元默字元直家河東理湖山下生卒七十  
九 當寧己丑朝廷錄其行 贈官由司憲府監察  
至吏曹叅議尋又旋間優典所及鄉邦動色噫豈無  
所以而然哉按狀公蚤孤能執禮過哀母患瘡輒齋  
沐禱天及長朝耕夜讀如董生行勤儉節縮克成家  
業子男八人頃領齊長則謂說居無教近於禽獸爲



別建書塾曰養正齋序經史儲糧餉迎師聚徒以資  
講習至其一或放縱而入無底之坑不測之淵者亦  
容易事遂以懼扁其燕室蓋取多男多懼寓以身教  
之義也又書忍慎二字及言顧行行顧言六字揭之  
座側寓目警省平居身不近細苧食不兼魚肉豐于  
祭祀篤於故舊賙貧恤窮並曲有恩義晚好讀書殆  
忘寢食曰天下至樂儘在是矣間與兒孫輩問答每  
言學者用功言行相顧可謂切矣而必顧謾明命常  
目在之然後方可到至處又云慎其獨三字未始非  
喫緊地矣而必有戒慎不覩恐懼不聞底工夫然後

又加謹焉而可為天德王道之本云者真理到意圓  
絕非記誦俗儒所能及也此其實行邃德所以天人  
孚感子孫繁衍暮境百祿如川方至而人或以賀語  
加之輒曰吾早失怙恃子道未伸窮天之痛無地可  
洩豈以自享此樂安於心乎聞者莫不泫然其孺慕  
一念老而不替者又如此李氏系出陝川譜自江陽  
君開始八世祖應參以德行忠義聞于時曰璞曰東  
翼曰箕胤 贈掌樂正曰禫是其四世外祖慶州金  
世亮塋在八助面石橋上負甲原配密陽朴氏考聖  
新無育慶州金氏考先奎男長仁杓孝 贈童蒙教



官旌閭妻文氏以孝婦亦如之次仁氏進士敦寧都  
正仁裁仁致仁圭仁秘仁城仁轍孫曾不盡錄銘曰  
蒙以養正聖訓孔晰公能會意揭扁貽厥乃其自修  
一是悃悃善積于家惠及于物截彼之嚙有封馬鬣  
我管匪諛昭示無極

僉中樞忍菴全公墓碣銘

并序

維忠州沙亭負丑四尺而封者近故忍菴全公衣履  
之藏也公諱在赫字明夫以 健陵癸丑生八十  
三年乙亥用優老典陞通政大夫為僉知中樞府事  
蓋亦三代尚齒之遺法也公蚤孤事母孝晨昏枕席

朝夕滌髓躬親服勞不以委人奉先至誠忌日多在  
夏月果品魚肅別封貯于淨處時加檢省不至餽敗  
遠近先塋必置飭一少而失學晚好讀書又知功令  
外有用心處杜門誦念歛華就實不以耳目之所不  
聞觀事物之未及應接而或弛其敬戒存養之工嘗  
言為人底節目準則不越乎小大學中庸及程朱諸  
書此則得之舍則失之若但剽竊雕飾於文辭記誦  
之間而已則抑末也將何以治心脩身而不失聖賢  
教人之至意也是以終身窮約瓶缸無貯而處之晏  
如怠慢邪僻不設於身市井鄙俚不出於口秉志恬



淡臨事詳緩母夫人年九十一而終公亦六十餘矣  
衰境執禮不脫經帶展墓無間風雨手不釋卷老而  
采篤蓋其開端於梅山金公在範而傳習真實之力  
不可誣也金氏我東名族炳然事蹟載在史乘不須  
譜也曾大父尚行大父亨宇父鳳瑞母忠州朴氏訥  
齋祥後夫人江華崔氏考煥先公卒塋同塋二男二  
女男長履鉉次觀鉉女適韓泰會申恭永履鉉三男  
永枯永植永相觀鉉一男永純永枯一男恭洙永植  
一男益洙永相三男皆幼永純二男奎洙餘幼永植  
好問勤學士友多推重子賤之為君子豈無所以遠

為之銘曰

金出光山王謝其儔文敬宜菴克述箕裘亦粵自菴  
已卯善類公襲前休質美好學于何開端梅翁是則  
仁而得壽晚後緋玉鸞鵠停峙綦綦第祿視履考祥  
天報靡忒我聞厥幽揭此貞石

昌原府使休圃韓公墓碣銘 并序

帶方韓君瑑變翼袒免親敬錫琦錫躡門諗於不佞  
曰吾先祖休圃公葬而無刻垂四百餘年其在今日  
謂將銘焉世遠澤斬事難考實其欲已矣不明不仁  
罪又難容抑如之何余對曰無傷也尚論於百年之



後者不規規於事爲之末而槩乎其世道升降出處  
始終則斯較然矣謹按公諱晰字明勳休圃其號  
成宗丙戌 中廟己丑其生平墓在先塋壬坐之原  
韓氏系自殷太師箕子傳至威襄公蘭佐麗祖統合  
三韓位太尉寔爲鼻祖歷文惠思肅平簡入我 朝  
吏曹判書理謚忠簡於柳巷公脩爲難第是高祖以  
上中樞院事承舜 贈吏曹判書瑞龍判敦寧府事  
清城君終孫曾祖祖禰妣縣夫人光山金氏縣監以  
石女有達觀遠識世皆稱賢夫人公幼而莊重不妄  
言笑及長志尚卓犖泊於進取人皆以遠大期之始

寒暄金文敬公主盟儒門常以童學自居訓後進不  
倦而於清城公爲內從兄弟至是以母夫人命負笈  
從學廣其見聞習於誠敬而所資者深矣辛亥以薦  
由繕工副正陞司僕正翌年乞養爲昌原府使始至  
條列民生彙倫合做底事十餘則曉譬坊曲如陳古  
靈故事見義精明爲政慎密毀淫祠繕學宮儲書丹  
時餼糧以資其願學而力不及者吏憚民懷一境飲  
德文翼鄭公濯纓金公以兩南御史啓稟其清白自  
厲無愧爲西京宿吏云及歸士民立石以頌之時燕  
山主在儲宮惟慢遊是好賊臣子光愆患助惡事多



可憂而清川府院君伯倫於公爲族叔公謂地勢近  
密不可無匡救之策也貽書規勸極其懇至自是志  
在休退親黨或招以仕進輒辭曰老親在焉不可曠  
省安亭辛公永禧退居稷山別墅清名冠一世公訪  
焉則謂見今士氣殆若東漢之末危行言孫隱而不  
見此其時也於是與伯兄珍山奉慈闈南下連山尋  
遷于南原之漁隱洞杜門却掃左右圖書觴詠自適  
跡不近城府口不道雌黃或聞國有失政輒憂形于  
色嘗語從侄效元曰立朝事君當以忠信不欺為主  
本蓋其身居猷畝乃心王室者如此平居坦蕩喜愠

不形毋有宿疴每中夜禱辰願代丁憂居廬盡制病  
不滋味暑不釋衰奉先極力置仞一備香火又推其  
餘立義倉以贖窮族事伯兄甚謹老而彌篤此蓋公  
之懿行而其曰由道守貞不肯自小以取用安貧固  
窮未嘗自屈以從俗又曰刊去枝葉專要務實又曰  
不事空言踐實爲急云者則玄孫翊衛司侍直應祿  
氏考證於家庭聞見鄉井公評而叅酌折衷之論尤  
可信也淑夫人 氏後公三年卒墓附左生一男一  
女男繼輔護軍女別坐金順禮護軍二男四女男長  
烈司甕副正次燭司直金益彰宣教卽金自壽進士



柳泳李宗文婿也副正二男二女男長忠恕同敦寧  
次忠獻副司正女李弘章進士崔應湜同敦男長應  
吉然奉次即應祿昏朝立節次應俊護軍副司正男  
應禧寺正次應祺忠義衛應祉縣令女李邦彥都事  
李緯內外孫多不盡錄銘曰  
寒暄小學儒門準的公實咀嚙受用無敦薄試字拔  
蓋為親屈觀象玩占我心介石睠彼漁隱山紆水綠  
優哉游哉經史自適大易有訓其旋元吉考世論蹟  
庶見彷彿

直方齋文公墓碣銘

并序

故直方齋文公年三十二而以 景陵丙申卒于綾  
城居第之寢塋六十餘年而遺芬餘馥赫赫如昨日  
事蓋公自幼少時有遠大志課日誦念心箴四勿西  
銘等書揭壁寓省思無邪毋不敬寢不愧衾行不愧  
影於先輩尤慕鄭圃隱宋文正嘗有詩曰聖周代商  
日不負叩馬心一天昭昭日至今不死心又曰紫陽  
千載後大老降吾東喚醒後生夢斯道日正中噫之  
二事可以見進修之密性情之正矣竊欲表而著之  
以警夫老而無聞者公諱翼休字明汝南平人文氏  
自武成公多省始至江城君忠宣公益漸大顯歷純



質景惠郡綬即職孝行文學世不絕書傳至諱昌後  
柳眉巖薦于 朝除直長是八世以上 贈掌樂正  
命吾 贈叅議喜孟 贈叅判弼鎮知中樞永國四  
世妣光山金氏考守儉公天賦絕異自授小學言語  
慎重步履安詳日用踐履不踰繩尺性根孝友躬耕  
養親常以紙墨自隨隨得輒書是以文詞夙就輩行  
莫能先知事公嘗於親忌怒蔬菜不潔辭氣頗厲公  
從容稟白曰奠物固當潔敬而過爾聲色致齊之義  
不瑕有損知事公欣然納之友兄弟產什無彼我敬  
謹事長慈詳勉人治身勤儉常衣大布行有餘力輒

講究不懈曰必待掃却冗務占得優閒時節則必無  
讀書之日值 國忌不御酒肉姻戚知舊計至亦行  
素三日此其嘉言善行又可求之古人中者顧乃與  
伯豐正思一流人同歸於苗而不秀豈氣之清者數  
必局天亦有無可奈何者耶可惜也已墓在白巖村  
戊麓夫人咸陽朴氏洙鉉女事舅姑孝奉君子無違  
禮墓各祔二男明煥炳煥載晉載秀載憲載昶載顯  
高永柱高濟圭朴岐陽妻長房生載達載軾載熙尹  
某林應圭妻次房生曾孫若干人明煥早孤力學老  
而彌篤遠地馳書請豎阡之文不敢以病廢辭銘曰



戒慎恐懼持敬之本格物致知明義之端公實服膺  
庶回狂瀾不究其志而蓄其年我述其蹟庸告來人

勉菴先生文集卷之二十九

墓碣  
勉菴先生文集卷之三十目錄

碧潼郡守金公墓碣銘

軍資監主簿柳公墓碣銘

晚圃魏公墓碣銘

直長 贈左承旨白公墓碣銘

司憲府掌令高公墓碣銘

麗谷高公墓碣銘

成均進士黃公墓碣銘

同中樞金公墓碣銘



成均生員金公墓碣銘

漢城判官 贈吏曹叅議草谷朴公墓碣銘

禦侮將軍柳公墓碣銘

大司諫吳公墓碣銘

大護軍遜齋朴公墓碣銘

執義 贈吏曹叅議芝浦郭公墓碣銘

敦寧府都正小江李公墓碣銘

山水處士李公墓碣銘

同敦寧劉公墓碣銘

尚衣院直長沈公墓碣銘

心齋柳公墓碣銘

確齋洪公墓碣銘

戶曹叅判 贈左贊成尹公墓碣銘

止巢處士吳公墓碣銘

竹亭李公墓碣銘

繕工監假監役鄭公墓碣銘

河東郡守姜君墓碣銘

蘆山張公墓碣銘

同中樞 贈吏曹判書任公墓碣銘

義禁府都事臨齋徐公墓碣銘



勉菴先生文集卷之三十目錄

勉菴先生文集卷之三十

墓碣

碧潼郡守金公墓碣銘

并序

夫人類記誦以為博夸毗以為能而一言之幾乎道者蓋亦鮮焉其曰人心如舟搖搖不定必以道心為柁行止進退一聽其為然後瞿塘灑灑穩若平地者乃心柁金公喫緊自道語也頃在甲午之變中外喪魄罔不為沫孝吉濬諸賊所指使服役禮義宗國居然作小日本公以眇然封疆之官慷慨特立不改先王之法服克守祖宗之典章曉諭坊民慎勿使外國



人犯境至朝廷欲罷郡移屬傷邑而民心未附則又  
力言不可依舊乃已噫若公真可謂能踐其言者歟  
公諱永詰字允明金氏光山巨室如黃岡沙溪慎齋  
三先生道德事功載之國乘垂諸金石不須譜也高  
祖相慎察訪曾祖箕烈副護軍祖在溫通德郎考光  
鉉司猛妣完山李氏考永祿全州李氏考亨義 憲  
宗丙申 當宁辛丑其生卒恩津彩雲山壬原其葬  
大丘中軍堂上宣傳官熙川郡守江華中軍雲峰縣  
監碧潼郡守其履歷在熙川值歲歉民艱食申于巡  
營得還米二百斛四分一給饒戶以備經用餘賑窮

民至秋年登洽充原數有餘一境蒙惠碧之為邑與  
遼相接前此我民之耕食其地而至是為清人所占  
據收粟者輒逐一還推以給佃戶所到初政以修葺  
聖廟為先務朔望必展謁次以及於公廨城堡類捐  
俸為之不費民力境內有與親同年及孤孀無依者  
輒歲時存問及其遞歸垂髮戴白莫不懷惠或陳狀  
願留或立石紀蹟有曰倉俸無濫學庫清刷昧爽規  
事公案無滯有曰遯矣西土制彼東洋一片雪城千  
里金湯其治績也恒以早年遊宦不及養親為至恨  
每值諱日哭失聲衣裾盡濕於先忌雖在逆旅紛華



中必齋素坐而達曙世近先墓並設齋舍置祭田至  
如文元公臨履亭之重建文敬公從享儀之竣事一  
是公始終效力取致自乙未以後歛跡丘園却掃一  
室左右圖書身不設怠慢口不出鄙俚訓子侄以義  
方親踈族戚盡情調急鄰里鄉黨隨力資給而憂  
宗國之綴旒慨世道之淪胥恒掩抑如有失此又其  
事親奉先進退出處之大畧也經臺金公圭齋南公  
之見推以需世才用者其以是歟配淑夫人全州李  
氏通德即瑤朮女婦德克備有女士稱墓各附男哲  
洙司馬 順陵叅奉余南遷後新文也丐以暨表之

文顧多口蹤跡重以昏耄千人金石萬非其任而擇  
狂古道不容終孤遂依狀叙次如右銘曰

公生名門若有為考運丁陽加不大施考屬在邊圉  
守舊篤考斯足知公餘可略考我闡厥幽昭千億考

軍資監主簿柳公墓碣銘 并序

穆陵朝有一執韋君子官止軍資主簿年僅三十有  
二而能輕軀命重倫常辦大節於鋒鏑之間者高興  
柳公春苾字國馨即其人也以遺衣冠招魂葬于井  
邑縣西甕巖亥坐之原距今三百餘年墓尚無刻後  
孫寬鉉秉湜講不明不仁之戒以故縣監李彙廷所



為狀來請銘于余余固辭非其任而不可得按柳氏  
之先著自麗朝世襲簪纓 本朝有王子師傳諱龜  
山於公為五世司憲府監察諱淵通德即諱懷芝諱  
涵即其曾祖祖彌妣引義宋氏奉禮汝禧之女公以  
宣廟丙寅三月十九日生自幼氣宇軒昂有出類超  
羣之像門祖於公常器異之十歲讀張巡傳至雷  
萬春事歎曰此真丈夫也遂投筆習弓中乙酉慶科  
選入宣傳辛卯除主簿避時論乖張棄仕還鄉壬辰  
倭寇犯境旬日之間三都失守八域瓦解公與門姪  
希津方謀舉義時淳昌郡守金齊閔佐即金景壽諸

人召募義兵于長城笠巖山公與恭仁李守一務安  
尹趙羅州金溥金溟洪遠等往赴之過蘆嶺顧謂希  
津曰漢孔明唐張巡鞠躬盡瘁以死為期皆可謂深  
得古人捨生取義之旨吾志已定矣於是金齊閔為  
盟主景壽為義將而兵力草創公謂諸公曰赴難不  
可虛徐而勝負兵家常事必須進有所賴退有所守  
然後可以萬全仍薦尹都事軫使之築城為深根固  
本之計即移軍留陣于礪山皇華亭時朝令轉漕湖  
南穀以供天兵且以嶺南軍食告乏有移給之命  
而嶺中賊勢大熾極擇智勇俱備之人公應其選及



漕運泊于統管李忠武公見而嘉之曰涉險冒危之  
勇無愧古人癸巳正月聞夫將李提督克復平壤之  
報遂與諸公移軍安竹之間以要賊徒未幾旋師南  
下招諭列邑募兵聚粟與尹公謀事以備不虞及丁  
酉再蹙率家僮數十舉義出境賊將雲忠率大軍奄  
至公奮擊大破之殺傷甚衆賊散而復合矢石如雨  
劔戟如山公膽氣益壯所向無不摧折忽乘馬顛仆  
遂陷于賊賊惜其忠勇誘脅萬端而顏色不變罵不  
絕口竟被斫害即九月六日也雖古之顏杲卿何以  
加此不移時雲忠嘔血而死豈非忠魂義魄不隨死

而亾有此靈驗也歟當時事蹟昭載芑山邑誌及同  
事諸公文字且夫汗馬橋馬闕洞皆公力戰處而至  
于今雲慘風悲行路為之咨嗟後因士林公議追配  
于忠武公祠嗚呼自古忠臣烈士殺身報國者何限  
而彼皆職當其責身處其地不可不死而後死之也  
若公則鮮官閒居初無軍國之任杜門自靖邈世無  
閔何所不可而顧乃忠肝義膽按住不得再赴急難  
竟蹈白刃而不悔非見義而不見利知有君父而不  
知有其身烏能如是蓋其稟革之志已蓄於就傅之  
年讀傳之日而非但天授姿性有異於人學問培養



之力亦不可誣也豈流俗武夫徒事弓馬者所可及  
哉公娶瀛州李氏鳳年女育一男曰廷建 贈軍資  
監正孫男應亨 贈禮曹叅議曾玄以下不盡記銘  
曰  
生而苟生何足榮死得其死死亦猶生惟身之亡  
而節之全刻詞于石昭示百世

晚圃魏公墓碣銘并序

天冠山下丹山之里魏氏居焉有剩餘翁諱命德從  
遊屏溪尹先生與其子溪隱公諱師甲行義俱篤溪  
隱公有子曰守潭受學于族叔存齋公伯珪號爾默

窩處士公默窩之孫諱弼祚字義瑞號晚圃系出長  
興壬辰扈 聖功臣 贈戶曹判書諱德和其八世  
祖也考諱榮杰出系于叔父守章外祖清風金天益  
公稟質寬厚容貌休休篤於事親值歲歉負米數十  
里或取溪鮮畢給甘旨及疾嘗糞驗症禱辰願代喪  
盡其哀祭盡其誠而孝德備矣與伯氏友爰彌篤食  
飲居處必隨處照管一心靡懈如司馬光故事親戚  
中貧不能喪葬嫁娶者並曲有恩義御家有法度巫  
覡符章切不入門內訓子侄以義方嘗書劬躬接物  
之方十三條揭之座右晨夕寓目而警省焉少業公



車不售有司晚以小學論語程朱諸賢文字仰思俯  
讀為究竟法嘗與南坡李上舍僖錫岐山盧上舍瑄  
交契密勿觴詠自適不知世外榮辱得喪之為何事  
其詩曰守分雲林養性真怡然白髮太平人正心坐  
究春秋義飽喫烟霞絕俗塵以至設門契收宗族躬  
義舉禦洋賊皆言足聽聞槩而論之殆所謂可欲之  
善有已之信也噫豈易然哉乃以今 上乙亥二月  
二十四日考終于寢距其生 正宗丁巳享年七十  
九墓本面血時內卯原夫人南平文氏達斗女事舅  
姑盡孝道奉君子無違禮男長準權次象權孫男啓

致啓善啓玆啓來啓瑛曾孫男德奎三奎興奎在奎  
宗圭大圭南圭冕圭餘不盡錄銘曰

遂寧顯閥魏氏最良胄羅歷麗名位孔昌承繼綿綿  
以及公身孝友實德誦在鄉鄰瞻茲一丘衣履所託  
鏤辭于石以警樵牧

直長 贈左承旨白公墓碣銘 并序

蓋當我 穆陵壬辰之役嶺湖間簪纓世族草野願  
忠莫不以親上死長之心效奮義敵愾之功雖地望  
勞績不無微著淺深之別而其所以賢愚合心大小  
戮力以成中興一治則不可以差殊者述古堂白公



亦其一也公諱民秀字起元其先水原人以高麗典書忠肅公莊爲顯祖歷屢世至工曹判書靖國功臣貞海君壽長是其高祖曾大父世雄永興府判官大父珩司僕寺正父承宗訓鍊院主簿母竹山安氏主簿航女公天稟魁偉年十五六博通經傳備儻有大志從聘君文楓菴緯世募義旅聚糧餉大會于山陽推任公啓英爲盟主與日休堂崔公慶會鄭公思愴合陣遇賊於長水破之又戰至星州開寧斬獲甚多又至于錦山梨峙佐權忠壯公大捷丁酉再變又從楓菴禦賊于龍潭一境賴安蓋公以眇末年少協贊

軍謀動無遺策或挫其方張之勢或絕其窺覘之路雖老於兵者莫之或先事聞特授濟用監直長錄宣武原從勲 萬曆乙卯卒于家距生丁丑享年纔三十九葬在長興舟山西麓貞海君墓下乾原後 贈左承旨鄉人建祠俎豆梅山洪文敬公撰丁享祝文夫人 贈淑夫人南平文氏卽楓菴公女二男三女男長尚瑛宣傳官次尚瑜 贈叅判女適士人金楨鄭渭望金時說孫男漢羽忠義衛漢杓宣傳官漢翼漢圭漢翁並通德漢相府使曾玄以下繁不錄公家文獻殘缺惟故度支侍郎尹公致謙所撰墓表可據



而若有刑潤者嗣孫致官由寅講不明不仁之戒使  
其族弟景寬謀及於余竊惟古之君子欲顯其祖先  
者惟立身揚名之可恃是以不恥於人而尤諸已不  
務其外而務其內公之事誠難矣然其所以垂名後  
來者豈獨以一朝慷慨投袂為哉是必有所本者矣  
復何憚焉銘曰

終軍請纓古亦難匹公未弱冠隻手討賊賦既厚矣  
年胡其畜我述遺事垂示千百

司憲府掌令高公墓碣銘

并序

興德治東二十里魚龍浦之西麓故掌令高公衣履

之藏也後孫等將謀伐石顯刻以資墓隧走其門子  
弟石鎮禮鎮濟萬問銘于余雖老病甲管其於考世  
尚論不可牢辭謹按公諱直其先耽羅人後有封長  
澤君移籍焉考諱臣傳麗朝北部尚書運訖固守罔  
僕耕于靈光高城山中 太宗朝以同年舊契入於  
邑求除戶曹參議不屈至有待同年何太薄之 教  
祖諱伯顏知寧州郡事妣松京王氏益元大君昭女  
配海州崔氏監司璫女墓附左公天性惆儻不羣於  
富貴泊如也除司憲府掌令屢辭不就遂遜于興德  
子孫仍家焉噫 獻陵之初明良際會不啻如風雲



魚水而公獨趾先美杜門守貞以終其身蓋其廉頑  
立懦之風足為師表來世是可銘也已銘曰  
國初威際後又蜚英公紹先徽屢辭特徵筮遯與  
落華銷聲父作子述終古餘馨天報不食子姓繁衍  
我庸銘立示諸永年

麗谷高公墓碣銘

并序

嗚呼此故 萬曆壬辰倡義麗谷高公之墓也九世  
孫石鎮懼遺事之寢泯略述其行請余為銘竊惟石  
鎮從遊有素慷慨尚氣節其言且不誣按狀公諱德  
鵬字南翊系出長澤新羅星主厚清為鼻祖世襲圭

組麗未有諱臣傳當 太祖更化遯跡于靈光之高  
城山 太宗以同年舊契除虜曹參議不受寓居興  
德子孫家焉禮曹佐郎世柱主簿億齡參奉應軫其  
曾祖祖考也妣扶安金氏孫文公以 嘉靖壬子  
生志氣倜儻識量宏遠 宣祖龍蛇之變見族兄霽  
峰公倡義檄與公中樞蔡弘國等往赴錦山時賊勢  
大熾霽峯殉節列郡風靡公與同事諸公收散卒復  
檄歃血同盟于本縣北面之南塘即九十二義士也  
於是眾推公為盟主且以蔡公之善騎射為義將公  
誓于眾曰髮毛身體皆是父母之遺今 聖上亦父



母也豈惜一死不救父母之急乎權都元帥慄亦以書勉之曰張巡許遠之責惟在諸君子其見重於軍旅之間者有如此一日獲一賊酋衆欲殺之公輒釋不殺以是詳探賊情戰必得捷將赴晉州聞提督失利經略主和遂慟哭振旅而還丁酉再變與前日諸公召募義旅復為盟主轉戰于扶安上掠時斬馘甚多亂已歸養其親不取聞達卒于丙寅月日壽七十五塋在一南面秀山癸坐原配平康蔡氏叅奉蓼女二男守謙處謙僉中樞俱有行誼孫男汝興號闇隱處士汝仁汝徵汝漢汝綱汝章女吳翽朴世茂長房

出汝善側出汝勸汝孝汝勸汝意號覺後堂次房出曾玄以下不盡記蓋嘗論之公以英邁之姿兼詩禮之學生而爵祿不及歿而文獻無傳至今三百餘年所可徵信者惟會盟錄節義錄而其他行治無得以詳焉此為可恨然公之前後所秉執者忠義也其視遺親後君之徒樹立果何如也後 贈通政大夫承政院左承旨銘曰

卓彼秀山義士攸藏有來千秋母或礪傷

成均進士黃公墓碣銘

并序

我 憲宗十二年丙午夏四月七日光陽前進士雲



臯黃公卒年四十八隣里婦孺皆流泣相吊及塋操  
文致奠者相屬於道 哲宗辛亥朝廷推孝理之政  
表厥宅里是其信於人而得於天者將不待垂諸金  
石而可傳於無窮矣謹按公諱夏錫字忠汝昌原之  
黃出自中國麗末平章事檜山府院君石奇寔爲東  
來顯祖至進士後憲遜于光子孫因居焉是生主簿  
萬卷主簿生叅奉鍾叅奉生性業有壬辰義蹟是七  
世以上曾祖諱札祖諱尚弼考諱勉基進士號聽溪  
堂世襲行義妣順興安氏克明女公天姿奇偉六歲  
能上學聰明強記多出人意表塾師驚歎已而聽溪

公聞蓮榜一等聞喜宴儀觀甚盛公趨而前曰小子  
勤工亦當如此自是居宿外舍讀書節度不甚提督  
而自能刻意孜孜一遵課程見同學有飢者必邀至  
家同案共食或稟告父母俾有所恤至于卯弁文調  
斐然乃以 純廟丙子魁司馬時年方十八聽溪公  
謂掛名儒籍於父母之望門戶之計未始非大同所  
欲而律以古訓則亦三不幸之一慎毋謂吾事已了  
而怠於讀書也公言下籍佩雖在事務煩劇中佔畢  
誦念罔或間斷丁內憂三年不魚肉聽溪公寢疾數  
月輒心憂色沮或并日不食或連夜不寐禱服請代



血指以繼而不效焉則叩號擗踊絕而復蘇者數矣  
執喪禮制送終儀節必誠必慎終始如一內外族戚  
素多貧乏源源贖恤歲以為常值歉荒閭里飢戶計  
口賑給輪行疹疾備豫當劑賴以全活者甚眾賓客  
往來酬接甚勤座樽不空戶屨常滿雖尋常寒乞未  
嘗以冷色加之有一病兒父死無依慮在溝壑者亟  
引置室中診察病根療治數月新其服優其贖而還  
之幹家數十年無尺寸增益所專心致意者即唯曰  
篤於奉先厚昆季姊妹急於惠人利物之政也餘外  
善蹟無非可述槩以言之一是孝之推也是道也以

之修身則身立而名尊以之應事則事叙而榮光以  
之御家則家正而倫明以之治國則國恭而民安無  
所用而不利無所往而不通則其以草野之微達於  
聽卑之天而為百世之鑑者亦公分內事也然豈易  
言哉墓在津上面竹林村坐艮之原配全州李氏錫  
龜女先公十年歿附左男四人長潤觀通德郎文行  
被鄉薦次潤豐敦寧都正潤謙通政潤復一女適安  
東權秉仁孫男廷模永模俊模過房競模錡模晉模  
女尹喜奎任崇鉉妻長房出贊模哲模海模昭寧園  
守奉官諡模南原梁錫瑤江陵劉載述進士慶州全



在豐光州金挺淳妻次房出正模善模文化柳濟光  
妻三房出四房系子俊模江華分教官女全州李教  
仁曾玄不盡錄晉模以余有一日之長雪程踏躡請  
所以刻遂為之銘曰

白雲之山蒼蒼兮孝子之畚蟾湖之水湯湯兮孝子  
之漁我銘在石兮讀者其肅諸

同中樞金公墓碣銘并序

全君漢穆懇余為述其先大父愚叟翁壙誌又作而  
言曰五世祖同樞公墓刻未就願率惠焉噫近且詳  
者尚云不敢况事涉久遠邃行潛德有未易名言者

乎辭謝不獲則竊詳公生年八十有九年不訖聞達  
養德林樊孝悌敦睦為家計心近小學做程曆事親  
以禮友于盡情而大本立矣屏絕芬華安於窮約而  
心德全焉族戚之無依賴者若恫在已賙恤有常諸  
姪之失蒙養者視同己出教誨不倦慮宗姪艱食無  
以奉先則又設契立約為什一之資平居必整襟危  
坐敬對方冊笑不啓齒怒不遽色謙遜自持口不雌  
黃待人接物一以忠信樂易不設畦畛是其御家之  
正自治之篤嘗求之古昔而非拘儒俗士所能及也  
嘗構小屋為子孫講學肄業之所取大易之象扁以



直方又手植冬青於庭畔命其室曰晚翠者亦以取  
後凋之節也終之天錫難老氣貌豐盈觀聽彌康克  
享志物之養於異糧之日而二品顯秩有隕自天房  
下子姓類皆趾述無怠蓄穫不休無宴安歧徑之誘  
有慶善循理之樂者一是公積蔭之所暨也仁者其  
壽善必有慶其是之謂歟公諱爾昌字泰卿金氏出  
靈光歷麗入我世襲紱冕至月峰公諱光遠從學靜  
菴趙先生列邑卯黨籍享俎豆其七世祖也高祖諱  
汝健以文行一命三徵並不就曾祖諱哲光陽縣監  
祖諱世鏡果毅校尉 贈叅議考諱沁 贈叅判妣

仁川李氏昌望女 肅宗丙子 正宗甲辰其設孤  
屬續之干支也葬全日時先塋子坐之原夫人草溪  
卞氏天羽女卒先公三十七年墓同原異墳三男一  
女男長重奎次重海重鳳女適朴臣宗孫男尚耆尚  
輔女高時慈重奎出尚及重海出尚鴻尚繹女李承  
煥重鳳出銘曰

猗歟我公蚤絕公車力究經籍尤深於易不師而得  
敬直義方儒門準則公惟浚造有文有質歲寒松柏  
志士所獨公乃自况始終靡忒 元陵優老普被恩  
渥煌煌 紫誥西樞其職所樂非外道充于中人皆



仰止翛然高風

成均生員金公墓碣銘

并序

北之洪原有篤行君子曰壽峰處士金公啓煥元章年七十三而以當子丁酉十月干支卒于三水僑居之寢翌年九月返塋先塋前後門生知舊加麻操文以祭者百餘人三從弟啓運述其行走書千餘里屬余爲石面文字噫有善不揚後死者過也雖甚老皆其可辭諸銘曰

金出鷄林垂炳史冊中世北遷譜自世福再傳起立龍源是宅高祖大江以壽緋玉有子有孫采三振鳴

皇考斗顯韞韋成名母徐三子公乃居中弱不好美長愈明通拱承慈訓有順無逆師資柳菴父志是述專門公車戰藝庠塾橫鶩別驅輩行輒屈乃登膠庠士稱其吉進途方亨趨營可必已而不屑從吾所欲人有是身性善可學洙泗垂訓洛閩註釋用工節度戒懼謹獨治心治田等是一法善端擴充如苗培植惡念除去如莠拔拓內重外輕少誘深得蓬蒿養拙永矢弗告逍遙命臺二樂扁室梧月楊風樽俎下席以是爲養浮雲爵祿施不家庭六親湛樂出而應接士民儀則誰其與儔思山晚栢松墅渾齋道義磨琢



旬朔會講不廢程式次第修行庶規藍約囂絕讓興  
里間其淑有來樞衣儼立成行隨才施教而多善良  
居今古道竽瑟難諧誰秉廟筭引入虎豺王室如燬  
左右其空形格勢禁于何效忠萬山避地尚寐無聰  
从矣三甲未破天荒公乃奠居華峯之陽法言法服  
義附尊攘教民禮節標準一方作人之功沒世可忘  
浩然其逝大限斯迫些不怛化俯仰無怍猗歟我公  
長夜秉燭嗚呼皓天曷日其復相維曹氏二男述事  
膺基居長昇基出系洪韓兩李乃其女壻長峙之麓  
有封四尺儀形永闕於何復覲霜雪搖落松竹彌強

傳神在茲百世其長

漢城判官

贈吏曹參議草谷朴公墓碣銘

并序

余於壬寅嶺湖之役往來休息于龍鳳兩城之間鄉  
人士逞逞為余道壬辰島夷之亂草谷朴公鏖賊之  
功殉節之忠余每過其所謂栗峙石柱者未嘗不奮  
臂裂眦想見當時之英風偉烈而恨不復起公於九  
原矣粵四年乙巳余待命于漢城館公之十一世  
孫記注海昌以其父承宣周鉉之狀來謁表墓之文  
顧今衰頹雖不能為公矧為至於著公忠節以警今  
之柔懦者則義有所不敢辭者謹按公在宣廟朝



以寢即陞忠贊衛司直的知國家必被兵禍深以爲  
憂自天文地誌律曆筭數及兵家之書無不講究已  
而兵燹大起八路震蕩京城不守 大駕西遷即北  
向勸曰臣子受恩罔極豈可坐俟國亡使弟承成從  
弟資貞付送兵粟子高公得資倡義所因杖劍策馬  
從都元帥權公慄權公大喜曰吾黨其不孤乎與同  
驅馳結死生交錦山幸州之捷公參謀之力居多狀  
聞特除漢城判官公辭以無功不拜至丁酉丹難倭  
將義弘等自嶠南乘勝犯鳳城龍城界公倡率家僮  
隣丁數千人拒賊於山洞石柱等地而連捷焉賊圍

府城急府使任公鉉請公爲外援公移兵赴救之至  
栗峙大塵戰十餘斬獲孔多賊血灑衣衣盡赤矢窮  
刀折猶奮擊不已竟中丸而卒配淑夫人聞凶音因  
下從弟及從弟亦殉于晉陽嗚呼龍蛇之禍烈矣東  
土舍生之類幾無子遺而自當時方伯守令以及朝  
紳韋布之舉義討賊者在在可述中興之功實賴于  
此况公之一門三忠比諸高霽峰猶多一烈而湮沒  
數百年至今 上辛卯始 贈公吏曹參議夫人及  
兩弟皆未及褒揚焉其幸而未泯者海東忠義錄與  
湖南節義錄所載爲可考實蹟而建祠宇之公議忠



莊祠之配享亦見其士論之不誣也見今離賊鴟張  
不血刃而吞食全國其禍之烈於壬丁不啻灼矣寥  
寥一世未聞有出一言者雖復欲爲公顯褒尚可得  
狀公諱繼成字而述其先出自新羅王子封於竹山  
子孫遂籍焉鼻祖諱奇悟太保三重大匡諡忠貞自  
後屢公屢卿代有聞人若文匡公諱全之文康公諱  
遠忠顯公諱門壽以大位勲大名節終勝朝之世入  
我朝有諱子良太宗朝按節湖南因退居龍城  
南作明倫和樂二堂月朔講會學者稱杏村先生寔  
公五世祖也會祖諱叔芬武科宣傳官祖諱崇祖

贈尹曾然議考諱世勲叅奉祀南陽房氏縣令貴和  
女也公之生歿月日及夫人姓貫皆無傳墓在南原  
水肯坊石峙道長洞癸坐原以夫人雙封有一男一  
女男虎母夫人致命之日方在襁褓有一婢懷入穴  
頭山乳養避禍後討白龍賊有功女適李仁豪孫男  
惟讓曾孫男長瑄次麟文科司諫次玩其後有持平  
龍祐屢踐清職承旨奎瑞嘗上疏諫撤萬東廟請  
留華西李先生周鉉亦博雅好古此公之餘蔭愈久  
未艾也狀言公自幼齡有巨人志以禮律身專心性  
理之學日誦心經小學事親至孝廬墓三年公之雅



言曰事親事君道不二忠孝之外無可求講學之暇  
輒肄習射御蓋公之立愷樹節實有所本云銘曰  
世平則講學行義可以善俗世亂則仗劍討賊可以  
死國是固丈夫之能事夫何足後世顯晦之介意惟  
其精忠毅烈之氣有不隨時而亾者則吾想其一朝  
爨為雷霆以掃氛穢而廓太陽龍城之南石峴之洞  
有舉然四尺而雙封者尚識其為忠臣烈婦之藏

禦侮將軍柳公墓碣銘

并序

叅奉柳君興澈洎健永不佞晚交也日踵門告曰吾  
先祖竹林公塋近三百餘年墓無表願借公一言之

重庸信來世余重違其懇不容固辭則謹按公諱期  
壽字寅伯姓柳氏文化人譜自麗朝大丞車達始歷  
文簡公公權文正公璪貞慎公陞溫靖公仁琦入我  
朝佐命功臣忠景公亮名義勲闕磊落相望為東方  
巨族曾大父緝司正大父承孫副司勇父潭禦侮外  
祖慶州金錫命生 中廟丁卯卒 宣祖癸未壽七  
十七爵階禦侮將軍今南原府南距數十里竹林村  
後負坎而封者即其藏公孝友天植事親無違志病  
致憂喪盡哀晨諱祠板朔望展墓不以風雨或廢篤  
於友于嘗言古人有九世同居者豈於兄弟而可分



勉齋集  
嬰乎族戚中貧不能辦吉凶費者並殫誠拮据無間  
親踈解經多深造自得如曰明善誠身先本後末乃  
士子之法門入孝出悌晝耕夜讀是御家之矩範以  
之而率子弟以之而教後進者皆言足聽聞是致遺  
風餘韻久而不泯至於牧兒樵叟咸指點其所居地  
謂竹林先生邁軸舊址者尤以見寔德懿行之八人  
深也配淑人龍潭高氏考末山無育弟忠壽有一子  
曰汀春階展力副尉出爲公嗣因戎之曰我祖我兄  
賴有依託死無憾矣惟我祀事汝其知之副尉公遵  
奉教誡及喪窆于公墓下歲時上壝同日薦享至今

如一日副尉男憲主簿趾述先美芝種醴源不可誣  
矣銘曰

我讀我書我穡我田思不出位以遺後人瞻茲斧堂  
歲月其積刻詞阡途警彼樵牧

大司諫吳公墓碣銘

并序

公諱凌字虛受系出咸陽麗朝上將軍諱光輝之八  
世孫也祖諱尚德 贈吏曹判書考諱致仁戶曹判  
書公生於 正統己巳歿於 正德丁卯壽五十九  
成宗甲午司馬癸卯文科由成均館學諭司諫院獻  
納善山府使陞通政爲大司諫其在諫院與李復善



崔溥尹暫守趙元紀鄭光弼諸公作本院契屏為善  
山廉潔自守歸時內裝只有搗杵一雙公笑曰此錐  
三寸木亦官物也遂投于江善人至今相傳為古事  
錄清白吏為諫長陳疏極言失政且斥權貴皆燕山  
時事也塋在南原朱村坊芝巖卯原初配長興馬氏  
考府院君天牧繼配平山申氏考牧使有慶墓皆同  
原育四男長彥輔府使次彥弼生員參奉彥公彥卿  
並通德孫男奉先奉後並參奉彥輔出濰參奉宗洪  
並忠順衛龍僉樞彥弼出英忠順衛彥卿出曾孫大  
謙參奉大遜生員麟甬同中樞麟趾參奉麟壽承仕

郎麟瑞武科萬戶萬齡前倭功臣同中樞玄孫震

贈工曹參判賢進士以下不盡錄噫公居官盡職當  
言而言可以取而不取槩知其為清直君子人也顧  
文獻斷爛不足徵今取錄者竒寢即字萬所綴拾也  
後孫珽錫璟錫來乞銘銘曰

冰蘖之操匪躬之忠全鼎一鑿蓋亦見公蓼水之東  
芝巖之宅詔彼茫茫不在斯刻

大護軍遜齋朴公墓碣銘

并序

維潭陽府西距加德山下坐丑堂斧而封者故大護  
軍遜齋朴公衣履之藏後孫汝容圭容等相與言吾



先祖塋於斯四百餘年墓尚無刻任其與土庶塚無別者靈若有知其肯曰余有後乎遂伐石為碑碑既具問銘於余余於朴氏所親者數人萬升已沒揚震起震鑽容並有文行相信甚久不可以文字之淺而事見屬之至意也謹按公諱衍生籍密城中移泰山有諱承奉見麗運告訖慕西山栗里之風廢舉不仕人稱義士是生德明虎翼副司正武科至三品是祖與考公以古家子智勇過人確然有不可奪之志端宗朝仕為折衝將軍行忠武侍衛司大護軍時世祖自首陽大君陞領議政威德日盛天命人心已

有所歸謀臣韓明澮權肇申叔舟鄭麟趾等出入潛邸行且翊戴改王而公亦受知遇曠絕顧不樂為用決意南歸託賤妾旅寓者曰爾乃人家婢子不可隨我同行他日有追我者恐爾不免竊詰出是書以示庶其免矣謹藏之勿失可也公既南則妾藏諸衣衿中和戎 世祖果招妾問公跡所在欲加以刑訊妾乃出公書以進 世祖覽畢立釋不復問蓋公書大意與妾永訣不顧榮祿故也及乙亥受禪六臣死而端宗徙矣丁丑 端宗竟昇遐屢徵公固稱疾不起當戊寅先後策二勳以潛邸舊恩 特旨遙賜佐翼



原從功券公終遯于府西月山之下女婚李碩孫家  
未幾而卒 純廟丙申士林建祠俎豆于長城之水  
山噫爵祿我所欲也名義亦我所欲也等是所欲而  
一左右間霄壤判焉當 二聖授受之際狐鼠輩之  
榮顯富貴意氣得得者其人可數而死之日民無得  
而穢焉士大夫之避舉肥遯沉淪沒世者亦何限其  
數而民到今稱之者其故何也是必有不依形而立  
不隨死而亡徹上下亘古今如一日者則公雖百世  
之遠其微意所在槩可想見大者如此小者宜略表  
德生卒官啣履歷之泯然無徵尤不足病也銘曰

近故蘆沙子六偉述公德以忠勇姿際昭明運狂奴  
舊契正應攀龍而有餘夷齊高標乃欲叩馬而無悔  
炳幾於人所不見之地決退於尚方有爲之前志尚  
誰知傳姓名於帶礪之券幽貞內闕付身世於天山  
之扁義甘婆娑夢斷熙穰自分平生之蹤跡不出秋  
城之鄉遂使後世之雲仍因襲奉山之實是謂不知  
無悶幾乎無得而稱賤子微此言薦詞阡途刻

執義

贈吏曹叅議芝浦郭公墓碣銘

并序

芝浦郭公諱之欽字欽魯清州世家府使 贈禮曹  
判書仙舟諱希泰之子同樞 贈判書西浦諱說之



孫內贍寺正 贈都承旨諱懷英之曾孫勝國忠臣  
文良公諱樞之八世孫也妣全州李氏縣監斗男女  
公生而聰穎岐嶷及長文辭贍敏戰藝場屋輩行莫  
能屈 崇禎庚午中進士翌年以薦除 健元陵叅  
奉遷 宗廟奉事司憲府監察戶曹佐卽所在稱職  
時賊臣器遠陰蓄不軌之志而入皆畏其威勢莫敢  
言者公常心憂之以爲禍在朝夕甲申三月反形已  
露遂與具金諸公決策奮討錄寧國原從勲一等乙  
酉擢柑製壯元卽拜戶曹正卽兼春秋館記注官尋  
移成均館直講改司憲府持平司諫院正言丁亥除

侍講院文學充接慰使赴東萊時差倭藤智繩等三  
輩狎至以偵知清虜事情爲辭飾詐虛囁朝廷駭懼  
監司許積以不勝任坐免公能應機善接平以無事  
倭乃輸情致敬而去還遷兵曹正卽選爲忠原縣監  
忠大邑多弊瘼難治至則奏減社倉逋穀萬餘石蘓  
殘祛弊民皆賴活己丑叅修 仁祖實錄冬以掌憲  
出爲平安御史褒著去甚黜陟得宜煇命除侍講院  
弼善辛卯丁內艱服闋復拜掌憲與同僚徐元履爭  
李興勃及完南李公論劾事忤 上旨與都憲李公  
一相皆坐黜署守禦使從事官甲午由右通禮除平



山府使莅任未幾政平訟息前此公在戶曹管供胡  
差以威信見重至是北使絡繹所經列郡多不堪命  
及入境飭管下曰本官賢大夫也慎勿生事如列邑  
枉是吏畏民樂多立石頌恩徵拜司諫院獻納兼春  
秋館編修官掌樂正成均司成轉司僕寺正以本官  
知製教陞司諫院司諫先是在兩司啓論尹晉道罪  
至是大司諫曹公漢英擅停其啓而歸咎於公公不  
肯分疏識者偉之已亥除長興府使以親老旋命  
毋赴未幾又拜司成爲養乞補開城經歷庚子春以  
司諫承召府民老少攀轅請留遂間道而歸遷宗

簿寺正兼孝廟實錄都廳郎轉司憲府執義辛丑  
五月九日考終于寢距其生萬曆辛丑十月二日  
壽六十一計閏上驚悼別致賻以都廳勞追加賞  
賚英廟甲寅贈通政大夫吏曹叅議塋在燕岐  
南面杜牧里仙舟墓下辛原兩夫人祔左右公德儀  
端凝器度寬弘明經曉大義善屬文旁通衆藝工畫  
格辭音律彈琴取古調孝出天性養極志物母夫人  
夙嬰痼疾平生侍藥未嘗解帶執喪哀禮俱盡毀幾  
滅性每諱日號擗如程括齋服依禪服製著儀節一  
從家禮染盛豐潔必盡如在之誠奉仙舟公怡愉定



省服勤老而不倦特構悠然堂以奉起居邀所親儕  
友以娛之佳辰頻數獻壽親作嬰兒戲如老萊與諸  
子孫歌舞奉庶母盡誠事叔父母如爺孃愛從父弟  
如同胞戚從黃公一皓遇虜禍也躬親襲歛至觸寒  
生疾而不顧鄉曲貧族窮交錄成冊子而記恤之接  
賓友雖病禮敬不衰御僮僕撫鄰里先恩而後威遠  
近化之其孝友本領忠厚實德有如此者憂國之誠  
終始如一 上有過舉不豫于邑一士登庸喜動于  
外聞人善歆賞贊揚見人過容恕掩藏其在臺閣論  
劾公正務詳審耻訐且依然有古諫臣風 國恤持

戒限卒矣 國忌行素必數日亦閑朝儀嘗從 駕  
行過關衆皆下乘公謂今從 駕在此所尊有在不  
宜貳其敬也衆乃止後遂爲例處官事明敏信孚片  
言折訟案無留簿吏民咸服其神明常以正倫厚俗  
爲本節用愛民爲務獎儒勸學風化大振律已廉潔  
非義饋遺雖微不受平生不營產業輕財好義訓導  
子孫先德行後文藝雅好山水愛長湍紫芝浦欲構  
亭退居而未果絕意芬華若將說焉當時善類以德  
相從能尤春西先生亦甚厚而及卒賢士大夫爭持  
輓誄助奠焉此其事君恤民行已處世之始終大略



免者集  
也配 贈淑夫人昌寧成氏宣教郎俊雄女安東金  
氏都事塗女五男昌徵都正大徵祭奉不就相徵於  
徵始徵師傳尤門高足孫曾以下以文蔭進者獻納  
萬績監役熙績郡守鎮基縣監鎮緯司諫鎮純僉正  
鎮億知樞聖濟正言龍濟承旨致燮而鎮緯於癸卯  
斯文之禍辨宋子誣扶世道餘多繼述可見垂裕之  
深積蔭之遠也九世孫漢紹早年志學從余遊久屬  
以金石之役噫公以清標直節遭遇 三朝主眷人  
望為世所重而顧沉淪庶僚不克展布所蘊者為可  
恨然使公隨眾俯仰致卿相之位厚於自奉享耄期

之壽身沒之後無得以稱焉則其不以此易彼也審  
矣此有志之士所以汲汲於取舍進退之間而屈伸  
榮枯未易與庸人凡夫道者著之身可已乎銘曰  
文良古家世德彰明西浦實學仙舟清名公襲前光  
有文有德仕主退遜政尚廉白自孝而推家行甚摯  
由忠而達臣道亦備高雅密博賢類許契忠信篤敬  
蠻夷輸意清不絕物儉不固最所若况干澤要路  
上眷非淺命實屯蹇子賢孫肖義方可見遠引不替  
無窮第程我管非謏昭示千百

敦寧府都正小江李公墓碣銘

并序



余居清和山中小江李公壯觀楓嶽而訪衣布躡屨  
純樸溢於貌聯枕一宵講論揚扃心甚仰止臨發留  
以詩意有所靡敢當者指遽屈二十霜墓木已拱矣  
嗣胤德夏屬以牲石之文拊念疇昔義不忍辭按公  
諱寅暹字進汝小江其號系 天潢廣平大君章懿  
公璵其始祖是生永順君恭昭公溥屬疏有副率退  
休堂朮益校理惟一曾祖吳中孝行 贈教官祖義  
浩考泰洲號江翁以行義 贈叅議 命旌閭妣慶  
州李氏重榦女生 純廟壬午髻齒沉深有器量聰  
明絕倫及就傅藝業日就應舉不利專意劬書喜讀

綱目手抄玩索博通經史人有問輒誦一遍以曉之  
孝根於天養志盡誠先公宿抱貞痼侍側扶將刀圭  
靡或替人又患大腫親吮濃汁三朔如一日嘗患痢  
嘗糞侍湯盡其方乃已二弟俱嬰奇疾盡心治藥終  
得效完先公臨終授遺戒數十條一切無違居憂情  
文備至卜塋地人有掘其先墓要賣者公不應從鼓  
山任公遊以仁柔溫謙見詡與季第爲天倫知己勸  
以從師晚愈講磨相得敦宗族重友道賙窮恤貧幽  
嘉盡道衣食尚儉宗黨模楷之令 上庚寅者科中  
進士尋除繕工監監役以優老典陞通政拜敦寧府



都正以是年九月二日卒葬于牙山縣南鸞城山子  
原公於晚暮恒憂海舶入境邪類豕突或至中夜不  
寐或與同志激慨每灑哀安之涕忠義之得於天賦  
有不可揜者矣儀相豐潤性度子諒待人接物和氣  
藹然愛惡無間喜怒不形至於婢僕不施箠楚晚有  
子平之志域內形勝筇屐殆遍而遊華陽洞詩最可  
見尊周之義矣配恩津宋氏考煥百仁明叔哲奉尊  
章事君子咸得其宜丁丑生癸未卒墓在忠州青山  
洞男長德夏前監理使次復夏起夏並筮仕女適趙  
性九金東哲長房男範頤郡守範尚範喆郡守側出

範競女適金哲洙次房男範震金婿男道煥餘不殫  
記噫往年不佞赴 召陳疏待 命闕外監理君日  
以過從今又遠訪新舊文感遂為之銘曰

孝友勤儉宗黨悅以服仁厚溫謙鼓翁詡其德春風  
和氣士友所共覲餘慶未艾子姓獲其福憂國傷時  
泉臺尚憤激屹彼鸞城不泐一片石

山水處士李公墓碣銘 并序

鼓山任先生講道新陽山中及門之士多彬彬可述  
山水處士李公亦其一也按公諱寅陽初諱寅昇字  
升汝系出 璿譜考秦淵號江翁有行義 贈官旌



間祖義浩曾祖昊中以孝 贈教官 世宗別子廣  
平大君諱璵其鼻祖妣慶州李氏重榦女 仁陵戊  
子今 上丙戌七月十六日其生卒葬在牙山南山  
里子原公自幼動止言辭儼若成人性聰悟而勤實  
讀書常為羣兒前導舞象能屬文功令甚精中身以  
親命從學鼓山門先生稱其天姿近道能立實心用  
工於四子取深喜讀石潭遺書悅服如親炙惺惺有  
夢見時性於孝親有疾躬執煎煮至達宵不寐母夫  
人眼眚失明左右扶將極其誠友于伯仲常設幔幃  
有春津之樂訓子侄導鄉鄰禮意切摯分析義理誅

褒甚嚴嘗著斥邪文及我我錄跋以見志甲申衣制  
之變治疏數千言痛陳華夷之分洎十月穀下有變  
公不勝忠憤至入山痛哭尋以誅鋤國賊斥絕外和  
又治一疏形勢格禁俱不得上徹有志之士一進忠  
言抑亦有數歟居室書揭聖賢要訓與母自欺箴改  
過訓勸學文等篇晨夕誦念以自勗而警門徒有遺  
稿若干弓先娶新昌孟氏奎遠女後娶延安金氏芝  
秀女墓並祔無嗣取伯氏子起夏子之女李必婦孟  
氏出尹殷榮婦側出孫男範柱博士範植範根李婿  
男秉奎秉箕噫不佞昔年屏逐于朝棲遑畿郊公遠



辱書洎詩以託不面定文之義迺古道也愧不敢當  
而深冀其早晚一遇事未就而公之墓木已拱矣慨  
時事之日非歎朋知之凋落今於金石之役不容固  
辭銘曰

江翁肖子稟姿如玉從師有道希陽宿德餘事文章  
操守敦確幽谷芳蘭不染塵俗何處得來百難其贖  
我懷悠悠刻辭貞石

同敦寧劉公墓碣銘

并序

此國門東佛巖山下茁谷負辛而封者故同敦寧劉  
公之阡數百年無顯刻後孫等謀及於余按公諱碩

字大哉江陵人父暹監察 贈吏參策平難原從勳

大父世仁正言 贈吏議曾祖貴駟延安府使高祖

用恂禮曹叅議王川府院君文僖公做其七世母

贈貞夫人文河盧氏都事嶸女公蚤孤奉偏慈盡孝

寒溫之節甘旨之供必躬自照管志豪膽大兼治春

秋學於陰陽淑慝之界持論森然以陰補 順陵齋

即公始與許禰善 仁廟戊辰柳孝立許趙鄭沁等

潛結內外謂 天可射約日為期禰察知其情議于

公曰從子趙叅孝立謀奈何公曰昏朝幽廢 母后

神人共憤幸賴反正 宗社復安今逆豎背天構禍



不亡何待昔石碣大義滅親史稱純臣不如早圖乃  
使禱急報洪公瑞鳳洪公未及發申公欽微聞其言  
坐廟堂責洪公以不容少緩之意即分付申景祺李  
曙諸公不待上聞發卒逮捕得裏兵入城者鞠之  
誅盡凶逆於是錄公寧社原從勳超授工曹叅議尋  
陞嘉善爲同知敦寧府事逮丙子南漢之役又欲奮  
義旅見環城百里人烟俱絕乃仰天痛哭曰徒竊國  
廩不能救君父之急何以立於覆載之間乎擬引  
劍自裁者數四爲母夫人在堂乃陳疏告退隱居萬  
谷杜門自靖卒以丁亥十二月二十三日距生萬

曆戊子享年六十貞夫人晉陽姜氏考鴻逸延安金  
氏考進士俊男墓左右祔子岱楠郡守 贈叅判孫  
男尚敏同樞尚建敦寧都正尚俊副護軍女通政張  
承龍士人李元吉此乃狀辭大略而卽其曾孫生員  
萬成所錄遂略叙足銘銘曰

玉川佐命勤勞王室公襲庭訓無忝先蹟帝秦深耻  
之死靡忒佛山之麓有坎其墟我撮其蹟圭首方趺  
過者考德尚亦式車

尚衣院直長沈公墓碣銘 并序

沈公廷奎字命汝青松大家曾祖諱士希郡守祖諱



公藝府使考諱憲祖通德郎妣黃氏籍昌原考僉知  
仁紀宋氏籍鎮川考尚烈曰尚祖 景慕宮令全州  
柳氏參判義養女完山李氏縣監東鉉女其本生父  
母公李出公生長名門藝業夙就 憲宗己酉中司  
馬 哲宗丁巳除 綏陵參奉尋遷義禁府都事陞  
尚衣直長庚申五月病卒于寢距其生 純廟乙丑  
享年五十六葬水原清湖面先塋坐卯之原公性篤  
倫理慈病朮藥深山黑夜不避艱危居常侍側或朗  
讀小說以娛其心事所后母如所生養致其樂喪致  
其哀事丘嫂以禮與夫婦相敬如賓雖卜姓而露之

得宜閨門恒肅然愛季弟與從子教誨諄諄紀律甚  
嚴壘李夫人既擇定鮮原又以妹金氏婦懇別求一  
處應副壘師言此善於彼可易之公謂福人逢吉且  
吾妹所恃惟余一人何忍欺為雅性朴素大布大帛  
不以仕宦有異弱冠時有少艾乘夜送情輒視而不  
見官府繁華不聽一妓薦枕接人翰烟無間貴賤或  
有頑悖者必規正乃已蓋原始究終名實無疵一時  
善類之推重以法家拂士者決知非阿私之論也配  
慶州金氏進士晚喜女無男子子以從侄宜惠為嗣  
今 隆陵令二女適直閣李喬翼士人宋鍾應孫男



冕澤晟澤昇澤景澤謹菴處士宜允飭躬劬經不恥  
下問嘗以書來曰吾叔父墓木已拱尚闕顯刻幸垂  
一言以信來世遂不敢以老病辭撮其狀辭如右銘  
曰

相時滔滔貨利聲色習尚所移鮮蹈繩墨公姿峻嚴  
秉志靡忒其用不究士民均惜有穹篆石過者其式

心齋柳公墓碣銘并序

近世有豪傑之士奮起衆流之中一變世守之論而  
卓然樹立者前後得三人焉曰錦川任公圭直確齋  
洪公大心其一為謹即心齋處士柳公也公之事行

金重菴柳省齋兩公或誌或狀發揮無餘以余臭味  
之相近亦猥託金石之文不容牢辭遂按而叙之公  
諱始秀字羲元系出晉州以高麗上將軍推為上祖  
入我朝曰陽植戶叅曰自濱舍人曾祖達進士祖  
雲瞻考東鳴妣南陽洪氏秉尹女公生於仁陵丙  
戌卒於今上戊寅三月十四日葬在安城郡北面  
辰峴庚原公早失怙恃能力學自立著名場屋二十  
自海州南遊安分處士洪穰見而器之以兄子妻之  
授室以居令其子受舉業乃洪公也洪公慨然曰士  
生斯世所學豈止此乎公忽感悟相與尤古人為已



之學然所見聞皆扭於先入蓋公六世祖叅奉緯漢  
在 肅廟已巳疏請建 儲嗣宥鑄黨洪公於宇遂  
爲同姓後生故兩家之局於黨論已久至是洪公聞  
我華西先師講道淡上及門聽其緒論而心悅之勸  
公從遊公疑其尊宋子不肯及得誦雅言深致悔恨  
卽操文往祭靈進訪其門人與金柳兩公定交麗澤  
相資猶未信其尊宋一事益徇究彼此載籍以及大  
全反復之乃豁然曰今而後吾志定矣遂致書華門  
諸子快示嚮背之意東謁大老祠西至石潭作詩寓  
懷北入朝宗巖謁 高皇神壇審 毅皇遺墨及尤

翁以下尊周之蹟南見任全齋遍交西人名士或以  
知尊尤翁不知尊先祖詰之則曰以道則尊尤翁以  
親則尊先祖何病之有自此彘墻朱宋爲正宗而又  
以爲不學華翁無以爲進道階梯尊閣雅言沒身講  
服爲學本於誠敬知行兩進而於克己謹獨尤用力  
焉於是學徒至者衆公與洪公同心教導又謂洋禍  
前世所未有華翁捨性命力排其功無愧往哲吾儕  
當以其心爲心不可以賢愚有間丙子倭奴之始八  
也聞朝廷議和大憾曰人類陷於禽獸出位之戒不  
可拘也貽書全齋門人鄭胤永曰尊師若先舉一疏



公域應聲則 聖意庶幾感悟遂率徒西行與儒生  
洪在龜等時 闕疏格不入而許和 傳旨已降即  
痛哭而歸開戶與諸生講學初同郡姜健善復善亦  
以南人來學數年論議歸一於是黨論峻發衆鏘交  
集公曰吾敬守是非之正性餘不足計也丁丑洪公  
卒鄉人復擾之愈毅然不動焉公沉重質愨律身有  
法居必端跪行必高拱言不道非法接人謙虛雖蒙  
學必舍己家至貧日用調過多不可堪而處之裕如  
室僅二楹與夫人居隔一席器用不相亂暮夜亦必  
衣冠相對宗家絕遠親忌不得與祭用朱子說設紙  
位薦一爵泄哀齋戒盡禮竟日面墨無間袒括接諸  
生禮際甚嚴非衣冠不敢見月朔謁朱子像春秋行  
飲射讀法嘗語治心之方曰物欲陷溺之餘能厚加  
涵養則精神寧靜善端發見其講論大抵謹守成訓  
或少濃郁之味而於道器帥平理欲消長邪正所判  
凡係世教利害斯文明晦未嘗不挺身張氣矣有遺  
稿配南陽洪氏忍齋暹后藥女育一男曰占虎噫公  
歿數十年同志士友次第歸盡而蹄跡混一毀形換  
心人類殆盡安得如公數十輩戮力周旋萬一爲異  
日回陽之基乎踽踽宇宙掩涕足銘銘曰



陰陽已分元有淑慝易示嚮背公得扶抑有誰攜手  
洪公其確晦尤以華明尋階級丙子西瀾碩果方食  
同友亦和抱章痛哭退亦矢心日乾夕惕繩墨嚴密  
內行甚篤跡公終始不世其傑刻詞貞珉庸示千億

確齋洪公墓碣銘 并序

安城處士確齋洪公大心以今 上丁丑九月六日  
卒距生 憲宗丁酉年才四十一葬于栗里南麓未  
原計車所至士友多加麻哭臨賈人販婦亦流涕曰  
仁人亡矣盖公以豪傑之姿早辨淑慝能華世守之  
論祖尤翁彌華西而宗師之立脚進步父兄順之朋

友從之有振起斯文之勢局於司命中途不幸仁人  
君子痛惜當何如故我金重菴柳省齋兩先輩以誌  
以狀發揮靡憾以愚獲聞華翁緒論聲氣有通見屬  
墓文雖以病閣筆豈忍辭是役茲按公字汝章號確  
齋乃省齋所命南陽之洪以高麗金吾衛先幸為鼻  
祖入 國朝多顯人歷副提學洞默齋文僖公彥弼  
忍齋景憲公暹至僉樞敬立 天啓丁卯扈 駕江  
都於公七世曾祖熙賦祖榮祚考機號安分齋姓清  
州韓氏父象奎公自幼志氣超邁書孔子朱子及退  
溪於壁上每日瞻拜又書秦檜大罵之十歲遭內艱



哀毀終制長受舉業于柳心齋始秀旋以為士之為  
學不當止是與柳公直取古人心學而局於聞見未  
克脫灑一日慨然感悟遂擇賢師周遊四方及見華  
西先生聞宋子緒餘以為朱門傳授在茲委身師之  
因從重菴省齋益講華翁之學渙然不逆於心痛革  
舊染無所顧戀安分公亦信從之柳公始焉異同終  
亦合一門路既正益相奮作謂敬者為學頭腦心所  
主宰當貫動靜而所本則靜也平居置一木榻嗒然  
靜坐如畫中人起居語默整肅有節凡邊幅事絕不  
留情工於趨勒可武各家亦不復治受氣甚薄而持

養有道神常守舍凡事照管無失於致知用力甚精  
既理會大槩又務析微妙與人講辨必虛受從善於  
近日明德理氣之爭恐生釁隙如湖洛惓惓於朋友  
深信先師主理之說而慮其或有抑揚之過取朱子  
書更加詳細幾忘寢食謂居敬窮理貴乎力行踐實  
故日用動靜莫非克復存養之事事親奉先刑妻友  
弟隆師親友居鄉處世粹然可為學者法於立心謹  
王霸之塗行已審儒俗之辨明黨明嚮背之決謂草  
澤之士於國政固沒奈何惟天經民彝可以空言明  
之丙子倭奴之入也朝廷議和公聞之曰小華冠帶



亦入禽獸再書任祭酒憲晦勸之言任公辭以不敢  
出位遂冒雪上洛與儒生洪在龜等治疏伏 闕聞  
和議已決痛哭出城時任公辭官疏適至無一語及  
和事公慨然而歎既歸杜門自靖抱麟經講朱宋為  
畢生計欲從金公移居嘉平以密通 高皇神壇經  
綸略定遽爾中逝哀哉有遺稿配驪陽陳氏亨奎女  
二男塏塏女適李相珪噫公之為學以實踐擴充為  
體以息邪攘夷為用可謂感矣以其所處不溺不狃  
能執大公出幽谷而遷喬木洗世累而溯正脉者非  
天分高邁拔乎萃類不能也若天假之年其克德業

翼世道豈有量哉悼人類之將盡恨共濟之無援太  
息撫叙系之以銘銘曰

抑陰扶陽天地情性聖謨賢訓不啻明正分朋以來  
是非靡定惟公奮作兀然獨醒宗祖晦尤尊師華翁  
一遵繩墨不懈始終知行實學尊攘大義悅親獲友  
俯仰無愧若假遐壽進就曷限人歎之文增余長歎  
瞻彼栗罔四尺其封我撮其事告諸無窮

戶曹叅判 贈左贊成尹公墓碣銘 并序

在昔 穆陵盛際東方道學大明其得洛閩全體者  
惟石潭夫子一人而牛溪成先生并時同德如宋之



程張舉世名卿賢士出入兩門者甚多尹公重三字  
之任亦其一也坡平之尹著自麗朝太師諱莘達數  
傳至侍中諱瓘有拓關北大功謚文肅公八本朝  
諱巖尚 太宗女淑慶翁主叅佐翼功封坡平君謚  
齊度公寔公五世祖高祖諱俊丁司膳寺主簿 贈  
叅判曾祖諱希仁文科吏曹叅判祖諱興孝尚衣院  
判官 贈左承旨考諱範龍副護軍 贈吏曹叅判  
兩世之贈以公貴也妣陽城李氏昶之女生公栢  
嘉靖癸亥早志學問先從牛溪後事栗谷戊子中生  
員辛丑拜禁即陞尚衣直長嚴覈弊蠹奸細忌之誣

公不已竟坐罷公置對明白旋蒙 恩叙俄以金吾  
時事超陞六品階由引儀司評監察拜竹山縣監明  
年又為禮山縣監丙午擢明經科戊申為戶部郎以  
才任治財陞正郎以故累擬臺省不調以假通禮  
導 上上見儀度閑習自屬之間其名未幾拜正言  
自是歷啟華要為司諫輔德彌善各一持平文學二  
掌令九司導尚衣正亦一壬子陞通政拜刑曹叅議  
轉承政院同副承旨癸丑出為江原道觀察使有甘  
棠之化甲寅復為承旨乙卯拜水原防禦使丙辰捕  
劇賊以賞陞嘉善夏辭還公幹事有績 上愈欲用



之特授營建都監提調戊午拜京兆右尹刑曹叅判  
已未又叅戶曹是年三月以疾正終于笄春秋五十  
七訃聞撤朝禮葬 賜祭追 贈議政府左贊成公  
資性警敏器識弘遠孝友根天喪致哀祭致誠有妹  
家貧極力扶護祀事不令輪設蓋從栗翁正論也睦  
親戚無間疎昵接賓客和氣融洽賙急盡力故言於  
人無不信所居來者如歸為官祗力恪事重知人情  
急先世務凡所張設井井有法度在臺閣持法爭議  
不比于權其佐鞫也辭筆辯給按覈稱旨治巖邑也  
制猾胥懲頑民裁以三尺不少假貸夫人高靈申氏

黃海都事津之女企齋贊成光漢之孫舉五男二女  
男長坦先公物 贈寺正生男慶餘追 贈戶議次  
壘次埴皆次堪膳役次增進士女長適南陽君洪  
振道次適翰林柳命立夫人聰穎出人秉禮理家閨  
門肅如朝典公歿以死矢志見蓋棺自投庭下井以  
逝乃得聯車同窆公遊於大賢之門居家至行為世  
柯則立朝事業昭載國乘而月沙李文忠公既為神  
道之銘則愚何敢更贅為於公之十一世孫處士錫  
鳳以治碣無文碩得一言以刻之同門舊諒不敢固  
辭遂為之銘曰



坡平古闊石潭的源蜚揚 聖朝外內著勲平步貳  
卿望實俱隆有烈賢媛無愧配公揄揚有筆繫月沙  
翁我述以申仰百世風

止巢處士吳公墓碣銘 并序

吳君在烈袖竒寢郎字萬所述狀踏雪四百里踵門  
論於不佞曰吾從祖祖父止巢公生老林樊不少槩  
見念其風韻氣節庶可以廉頑立懦而堊近二十年  
金石闕焉願假一言資飾阡道余受而卒篇兩端竭  
美不容架疊無已則將撮而著之從簡示遠庶幾無  
傷也耶謹按公諱相鳳字台至吳氏籍咸陽以咸陽

府院君光輝為初祖傳至華圃諱處文選經術官輔  
德已卯禍作子主簿澄避跡遂為雲峰人通禮諱嗣  
宗夫人閔氏殉烈旋閭雲潭居士諱世熊著行義祖  
豆其鄉會祖諱徵王祖諱聖尹生諱仁源即公所後  
考正齋諱迂原有文行南陽房氏其本生父母公稟  
姿傑豪持論正大所到一座蕭然臨事善辭焚常以  
理勝不為力服嘗慨然於學校之廢弛緝綱之紊亂  
出而釐正鄉俗丕變手書四勿箴白鹿洞規揭之校  
堂至今名分正紀綱立一邑賴之皆公之力也 皇  
廟見撤柄臣挾天子逮捕請復疏儒士皆逃竄獨公



與疏首金漢忠坐而待命金就捕公謂曰為當為取  
禍禍亦甘心公勿動心訊告無隱我及金遠配公獨  
餞至郊外丙寅海寇陷沁都公時老矣而毅然欲為  
國一死傳檄倡義旅刻期勤 王寇退而止其致人  
感服畢義願忠者類如此四十後始發憤謂名教中  
自有用心處回美往事潦倒可惜遂折節讀書時或  
就正於一時長德如石南錦谷二宋先生末乃贊見  
於蘆沙奇先生退而言曰道在是矣誠心服勤無異  
諸子之於洛閩其克已尊賢虛心服善又如此故有  
識月朝或云有南陽抱膝底意想或云南岳鍾英道

儒以實行將舉狀公貽書會所曰諸公重我失德不  
聽即追還其狀用優老典超通政階享年八十四以  
今 上二十一年十二月干支考終于寢遺命以庸  
學近思等篇從葬曰吾平生用工最在此書不可忘  
也又曰杖乃先生所賜亦一體納壙計聞遠近知不  
知以至婦孺吏僕一辭皆曰吾鄉殆無人矣墓在南  
原府下麟巖水尺洞負乾之原配南原梁氏啓周女  
祔繼配慶州金氏彥圭女先公歿別祔女適安時琬  
蘓秉鎬鄭允龍權萬壽安時正梁氏出盧錫鉉李明  
秀權駟壽金氏出繼后子三炯兄相龍男也孫在浩



外孫不盡錄余曾於蘆沙遺集見為公文字各數篇  
今又參以狀本而反覆上下則蓋志存經濟學究聖  
賢而不但為一鄉之善士而已恨未能及公在世一  
遂執鞭之願也銘曰  
匪爵而尊匪祿而富得之於天有德有壽屬茲商商  
士無領袖蘆山道尊孰肯虛受公乃篤信金石其守  
在今則無於古或有才不售時名足垂後文以刻石  
用詔悠久

竹亭李公墓碣銘

并序

陝川李君斗煥以其六世祖諱慶龍字玄微之狀問

於余曰我李之氏于陝川始自羅朝江陽君諱開麗  
季有諱致文科舍人即杜門諸賢中一也我太祖  
屢徵不起趣于陝川屢傳至諱逸老當光海廢毋  
抗疏力爭謫黑山島丙子虜變以宗廟奉事陪  
廟八江都與兄逸英俱殉節夫人趙氏與伯姊朴氏  
亦同殉事聞旌閭前後褒旌凡八忠為四孝烈亦  
四高祖以上也曾祖諱星后承文院正字祖諱瑞虞  
考諱徽三壽階嘉善外祖星州襄尚弼以肅廟丁  
酉七月生稟姿穎悟性度溫厚御家以承先穀後為  
第一義常戒子孫曰忠孝烈三字吾家青氈勉哉勿



陸蓋其立志如是故雖不得位無所效忠然至於孝友之篤遠近聞風莫不敬服而歎賞焉晚構數椽于竹裏自號曰竹亭嘗誦淇澳詩以勵學問自修之義有時吟風弄月逍遙徜徉有迥超塵埃底意 正廟丁未五月五日卒墓在亭之一弓許子原配梁山李氏父通政希元墓附左有二男一女長長燁次國燁女金一剛長房二男處中道中季房一男實中此其世系子孫及平日行義大略願以一言表其墓噫夙余嶺南之役路由于陝因得仰瞻八旒而顛行忪未及登公之亭躡公之躅今於君益聞其所不聞信乎

芝醴泉之有根源也聞其亭畔之竹猗猗依舊可想其遺風未泯也詩曰維棠與梓必恭敬止矧於先公比德之物乎宜其後承之羹墻於斯竹歎銘曰綠竹猗猗維公之儀綠竹簣簣維公之德勿剪勿伐後孫是式刻于貞珉示諸永年

繕工監假監役鄭公墓碣銘

并序

余曩遊方丈嶺之人士以各行稱者余皆得文每語及其先長者必稱守拙鄭公宅教之賢既而其二子琪錫俊錫抱月臯趙公性家所為狀輿誌者謁曰願有以表墓許之而未遂歲丙午春俊錫又以其伯之



命來申前言謹按狀公風儀秀朗音韻瀏亮目所一覽耳所一聞記念無遺見資質之美也自幼無子翁過善養志考妣喪及王母承重皆盡情文雖老白首不任氣力然猶泣血感鄰里一弟六姊妹友愛備至撫孤姪如已出事門長以父道族戚隣里之不贍者皆救濟有術而无致意於凶荒貧人錢穀難報者必燒其券見倫理之篤也文藝夙就兼治明經屢屈公車而無幾微色惟以讀書教子為樂村前臨水構亭花月良辰速韻士文人飲酒賦詩平居戶屨常滿而各盡歡意喜山水遊遇得意處輒徜徉忘返見襟懷

之曠也中身以後杜門調病手未嘗釋卷曰看書最是調病妙方又曰聖賢書許多奚暇觀雜書雜書最壞人心術教子嚴立課程又常使習勞曰陶公運甍是警懶法婚姻禁資裝之盛曰招禍之原也治家戒衣食之侈曰損德之本也可見好學之心老且不衰而以所得施於家政者也公宅心平且絕無猜忿之私常曰念思難吾三字符也是以人雖欲索其苛曲崖異之行而不可得至臨義理肯綮處風旨蘄然有不可奪之操綜物斷事往往有人不可及者是又性情之正而可見才具之非小可也嗚呼此亦足以知



公而嶺人士之至今誦其德者有以也惜余未及見也晚霽一命為繕工監假監役行善之報止是而已耶公字舜吾以純廟丁亥生歿於今上巳丑諭甲纓二歲葬于昆山郭磴之子原即夫人全海許氏壙右也鄭之先出自海州其鼻祖曰肅高麗侍中八本朝有諱易諡貞度七傳而有諱文孚忠毅公是為公九世祖也曾祖乃毅號盤谷祖伯善考臣翼號月圃並有行義妣安東權氏郡守敏中孫思吉女河東鄭氏一蠹先生后德海女公鄭出也許氏考丞婦道甚備孝舅姑仁族戚丙子大歟專心救活及卒鄰

里皆巷哭曰麥未及熟賴誰而生乎生二男五女男即請銘者趙弘濟李鎬根都事鄭浩鎔侍御河載壘趙鏞肅其壻也琪錫子泰鎮二女婚鄭淳旭崔寅燁進士俊錫男女外孫皆幼余見智異之山重厚若丈人不與他人爭雄故生其下者多俊偉厚德之士若公者非其人也耶使出而見於世則吾知其事業之必有觀也嗚呼命夫銘曰善可紀德有慶裔於今後其永

河東郡守姜君墓碣銘并序

余在壬寅之歲過河東岳陽亭土人曰此一蠹鄭先



生講道之所而鞠爲茂草數百年今乃重建姜侯永  
吉之力也余心識而嘉之旣而侯之從父兄永斟致  
德以書來曰從弟永吉屢典郡縣皆有聲績而不幸  
早歿今將伐石表墓丐公一言以圖不朽仍念侯岳  
陽亭一事已可以得銘致德又吾十年舊要也必不  
以杜撰託我乃按狀狀曰君字敬三其先曰以式以  
隋兵馬都元帥東征高句麗仍留不返後世入晉州  
子孫因籍焉代有聞人曰淮伯曰頤德曰希孟曰龜  
孫曰克誠言行事業俱在國史是君八世以上 贈  
戶曹參判柱東同知中樞秦煥正言在勉副護軍益

會高曾祖考也妣安東權氏延日鄭氏坡平尹氏尹  
氏以己酉十二月舉君生而格局秀拔旣冠豁達好  
施有濟人之量屢試未中遂投筆登武科歷効力副  
尉虎賁衛右部將以承訓郎拜河東郡郡距本第八  
十里將之任謂諸族知舊曰如聞吾過失寄聲規戒  
無輒至公廨也旣蒞職退奸吏除民瘼或有持府牒  
歛雜稅之類輒驅逐越境人或危之而不顧也秩未  
滿移富平又遷昌寧尋知熊川君之爲政每以戢吏  
卹民爲務故所至吏民間風畏伏其遮熊川也郡民  
以謹賦稅效孝悌興學校防酒技戢盜賊五件事詣



府願留某年陞通政遂還田廬不復有仕進意每風  
和日暖朋酒逍遙於泉石之間欣然忘世以甲辰四  
月五日卒于寢得年五十六葬于本郡夫火谷漕倉  
村亥原君性質剛方氣味醇厚居家不務蓄積而賙  
窮恤貧居官不事威武而令行禁止蓋其洞豁之懷  
英邁之才僅見郡紱而未克究所蘊惜哉君娶晉陽  
河氏生四男三女男長甲秀議官次冕秀主事縉秀  
暉秀女鄭寬永朴在興曹在壘銘曰  
宅心之仁在家而急人乎而用智之明在官而績成  
乎而夫火谷封舉然余述其跡銘于前

蘆山張公墓碣銘 并序

洪原有一善士稟姿秀異志行高潔大為北儒之所  
推重者曰蘆山張公宅鎬字叔文其人也系出仁同  
大漢門下侍郎平章事新羅太傅尚書定懿公諱倣  
為鼻祖至本 朝有諱良位以摠管左薦雙城家焉  
傳至諱愛敏移居洪原 仁祖丙亂殉于皐巖於公  
六世曾祖時興祖文植考鴻老外祖濟州梁錫奎曰  
鶴老金寧金氏其所生父母也以 純祖辛卯生自  
幼儻有奇志早孤家貧喜讀書成童受業于思山  
朴公亨求之門廢舉子業勉為已學不以世間得喪



動其心同門諸子皆瞠乎若不及焉既而遍遊於梅  
山蕭齋鼓山諸儒賢之門而於三溪則請業殆浹旬  
將歸蕭翁使諸生言志公以願行橫渠井田呂氏鄉  
約以復古道為對蕭翁甚與之鼓翁亦書一剛字以  
勉之蓋其博學無方所得實多而至若服勤至死以  
致事一之誠則於思翁為始終焉嘗立文會契為為  
師需用之資生而衣服冠屨歿而所隴金石並無餘  
憾或有構誣及於師門則輒為文以辨之公篤於內  
行事毋至孝事兄如嚴父當其移天也母與兄許之  
公曰叔姪雖云猶父子無禮斜而與為後不忍為也

及出禮斜事所後一如所生生養並祭極其誠敬有  
一姊無子取族子為后及其歿其子貧乏不能家公  
為之奉几筵以終祥中年喪耦并曰無人公以禮自  
執待其除服而娶於宗族不問親疎而施其恩於鄉  
黨不計寒微而致其恭交人也只觀其志行而不取  
其言色勢利誨人也先祛其驕吝而指進于正大光  
明每喜誦曾子弘毅之語以為人不如此不能成大  
器晚來生計益拙以至厨烟屢絕身袍不全而處之  
晏如也以今 上丁亥正月人日卒于寢享年五十  
七塋于雲湖之葵原從先兆也配延安金氏某女舉



一男一女男進河女朱應驍後娶全州李氏萬白女  
舉一男四女男達河女李渭麟劉昇鉉餘未筭進河  
三男長秉烈早卒秉郁過房次幼公歿之十四年庚  
子門人朴鼎周來請墓石之文顧余老朽何敢當之  
惟金正巖基勉之狀朴謙齋寅和之誌甚詳且悉足  
以不朽公栝百世矣後之欲知公者據此而讀之當  
知其淵源之正學問之篤雖謂之東魯子賤北方陳  
良未足爲過而至若詩律文法之冲淡瑰偉律曆筭  
數之精透旁通在公爲餘事銘曰

卓哉張公挺生北鄙早自得師學以爲已下積累工  
致擴充方知行並進體用俱適果能此道足以爲士  
依狀述銘用告千禩

同中樞 贈吏曹判書任公墓碣銘 并序

上之二十九年壬辰宗伯奏言率同知中樞府事任  
奉夏孝親恤族俱有特行請以異秩旋之以行勸善  
之政 上兄之於是特 贈公資憲大夫吏曹判書  
兼如例又 命旌其門閭邦人士咸曰善之不可不  
爲如此越十有五年丙午其冢孫達備以希堂尹君  
錫鳳珩爲狀來請墓道之文余以亡國殘倖不堪任  
入金石事顧其請益懇不忍終孤謹按公字得仲號



三乎堂任氏系出中州紹興府慈溪縣諱澍始東來  
 仕高麗官御史大夫肇籍于豐川自是為東方大族  
 生諱子順官民部典書生諱向玉官政丞有忠節德  
 業生諱安吉入本朝登進士厥後雲仍簪組相承  
 曾祖諱相烈 贈司僕寺正祖諱導遠 贈左承旨  
 考諱祥白 贈戶曹叅判皆以公貴妣 贈貞夫人  
 順天全氏恭裕女昇平君溼后以 純廟壬午十月  
 十九日生兄弟四人公居末天姿淳美自齠髻孝悌  
 出類七歲遭父喪哀毀若成人事母盡敬雖微細  
 事必稟命而行冬溫夏凊昏定晨省出告反面一遵

古禮視膳嘗藥扶持抑搔腠胝如也丁憂易戚俱盡  
 三年不御酒肉蘭梅之形克瞿之容無媿古人几筵  
 奉柩宗家析居稍遠雖暴雨大雪朝夕往來未嘗或  
 廢每值喪餘恒如袒括終身如一日伯氏早卒事丘  
 嫂甚敬長姪又幼公撫恤孤孀恩意周遍營辦家事  
 祭祀無闕仲兄亦早世無嗣繼后割產底有成立總  
 功之親三十餘家同井而居有無共之累世祭田之  
 不贍墓隧之闕刻無不完備外王考祀孫零替香火  
 垂絕為之置田奉祀公之庄即藍浦之栗里也有山  
 林泉石之勝公築茅廬其地日與樵叟漁翁迭相談



酬自以爲樂別構書室備置經史令子孫肄業有志  
於學而貧不能齎糧者皆給料資學宗族故舊賙恤  
備至賴而成家者甚多今 上癸未除匠郎陞通政  
甲申拜敦寧府都正尋又陞嘉善爲同知中樞府事  
壬辰二月九日以疾卒于正寢享年七十一墓屢遷  
至乙未始完塋于郡之潑田而峨嵋山中臺後峰卯  
坐原齊 贈貞夫人義城金氏考斗鉉思齋正國后  
也幼有閨範及歸于公善事舅姑無違夫子友于妯  
娣咸得歡心生辛巳卒戊子墓祔舉二男一女長學  
準官軍司馬次鳳準女適藍浦白鶴洙達鎬主事敬

鎬起鎬技手女咸平李啓斗驪興閔泰蓋長房出政  
鎬命鎬承鎬女宜寧南廷鴻南昌祐次房出樂九樂  
八樂七女光山金東鉉白堦出曾孫男亮宰正宰達  
鎬出英宰敬鎬出內外孫曾數十餘人易曰積善之  
家必有餘慶其斯之謂歟蓋公既歿而士論齊發旣  
登聞于 朝而族人秦翼義準龍準斗模憲一等追  
感公恩爭出力以補刻石之役此可見公之德之入  
人深也銘曰

天生烝民曰有斯則其則維何彝倫是篤孝親悌兄  
恤鄰睦族非難亦難公能允迪世皆銜名我敦其實



世皆歛利我周其德臯鶴聲聞理則不忒生榮死旌  
煌煌天勅亦有孫冒其麗數十我作斯銘證彼後祿

義禁府都事臨齋徐公墓碣銘

并序

嶺之處士徐公諱贊奎以今 上乙巳正月二十二  
日考終于大丘南山里第之正寢距其生 仁陵乙  
酉壽八十一葬府西城山之賞花臺已原門人申鉉  
穆遠來問銘余忝在從遊義不忍辭謹按公字景襄  
鼻祖晉高麗版圖判書自是三世封達城君因籍焉  
九世祖思進壬辰倡義有功諱昌震號農隱諱吉復  
諱柅諱洪烈號稼圃皆隱居有行義寔為公高曾祖

考妣興海裴氏應綉女公生而聰穎五歲先公嘗飭  
令祀背公懷兩手而立曰手冷待温先公奇之嘗遊  
街上忽大雨羣兒皆仆地公為之扶護而還識者  
已知其不為凡人 憲廟丙午中進士遂棄舉業慨  
然有求道之志庚戌謁梅山先生于鷺湖梅山稱其  
勇猛奮發使以篤信守死四字為畢生符自是往來  
數年凡於聖賢出處之義天人性命之蘊靡不究極  
梅山嘗舉上帝臨汝毋貳爾心之語以勉之故號臨  
齋所與遊皆當世名儒趙肅齋任鼓山最愛重公嘗  
有吾道其南之歎方伯知府行飲射之禮必宿公為



賓縉紳行過者無不造門請業自今 上甲子至壬  
午以經行孝廉五登道剡繡衣李道宰又啓薦戊子  
除義禁府都事不就雅愛山水松域中名山足跡殆  
遍臨終戒子孫門人曰士不當憂貧惟當修身篤行  
毋失正路所著有就正錄梅山經禮說隨聞錄又有  
文集若干卷藏于家公身體短少才器過人而性根  
孝友事二親怡愉承順甘旨必具遊學四方反面未  
嘗過期及喪哀毀踰禮祭祀雖老病必躬行齟齬入  
山讀書每遇霖雨輒巡簷不已曰家住水邊一妹年  
幼恐犯水患御家以儉奢靡不接恤族以義總功同

嬰家貧無經歲之資冬月取紙裁衾以禦寒處之晏  
如使子姪勸幹稼穡曰服習勞苦心氣自強閨門之  
內和順雍穆無咨嗟色待人不設表襮論事明白平  
正衆議盈庭片言以折之平生無疾言遽色燕居山  
巾野服未嘗有標榜意每守宰致禮不入官府曰不  
敢爲澹臺罪人留心經濟如典章法度兵刑水利之  
屬靡不研究雖身在林樊志切君國每聞朝廷失宜  
輒慷慨發歎至或竟夕不寐尤謹春秋之義每歲虜  
曆必手書 崇禎年虜嘗與朴果齋海奎上疏請復  
萬東廟及泮教滋蔓曰彼以氣數我以道義今雖爲



氣數所勝陽無可盡之日方今之務惟在修明綱常  
以盡自修之實則外患當自不敢侵矣好獎訓士類  
見有資稟之美者必激厲開悟病世之學者徒事口  
耳嘗曰夫學者欲以進德行措事業也空言哢哢何  
益之有惟在務實行做實事而已教諸生必以大學  
為先曰此乃為學根柢苟能透得誠意一關則於為  
學思過半矣所居與州城相接囂塵雜還習俗頹梗  
而自公居此往往有聞風興起者筆畫亦精妙遠近  
多賢藏焉配恭人昌寧曹氏父錫鼎有婦德先公三  
十三年卒墓在本府佛母洞四男鎮國有才行鎮穆

進士曾先公歿鎮漢鎮馨二女申漢麟禹夏績長房  
孫男甲洙進士健洙女崔相鑄次房孫男敬洙女李  
晚基曾玄不盡錄往歲余南為嶺表得公於樽俎揖  
讓之間而知其為有道君子也噫以公天稟之美濟  
之以學問之純使其得時行道上可以煥皇猷下可  
以澤生民而命與時違卒死於蓬葦之牖則此有識  
之所共歎息而惟其稱述聖賢開進後學使吾道之  
傳不盡墜於地則其功亦大矣但今世道日非如公  
者又不可得見而余惟後死目見國家之狼狽則余  
又安得不為公長慟而繼之以銘耶銘曰



達山矗矗達水泐泐毓精孕秀篤生哲人自在岐嶷  
天質其純早親有道梅山之門天人之奧性命之原  
春秋數十禮儀三千驗之于事體之在身是曰實學  
豈惟空言龜山之南吾道俱焉有來蹒蹒莫出匪賢  
方伯擁篲行義以聞縻爾好爵冀或幡然適時大  
謬我志彌堅洛水齋澄有亭在瀝汀采蘭蒞水釣魴  
鱸豈余果忘有時長歎樂天憂世憂樂兩全城山之  
巔若堂其墳我銘匪謏昭揭于阡

勉菴先生文集卷之三十



